

四庫全書

史部

欽定四庫全書

水經注釋卷十八

仁和趙一清撰

渭水中

又東過武功縣北

渭水於縣斜水自南來注之水出縣西南衙領山北
歷斜谷逕五丈原東諸葛亮與步騭書曰僕前軍在
五丈原原在武功西十里餘水出武功縣故亦謂之

武功水也是以諸葛亮表云臣遣虎步監孟瑛據武功水東司馬懿因水長攻瑛營臣作竹橋越水射之橋成馳去其水北流注于渭地理志曰斜水出衙領北至郿注渭渭水又東逕馬冢北諸葛亮與步騭書曰馬冢在武功東十餘里有高勢攻之不便是以留耳渭水又逕武功縣故城北王莽之新光也地理志曰縣有太壹山古文以為終南杜預以為中南也亦曰太白山在武功縣南去長安二百里不知其高幾

何俗云武功太白去天三百山下軍行不得鼓角鼓角則疾風雨至杜彥達曰太白山南連武功山於諸山最為秀傑冬夏積雪望之皓然山上有谷春祠春櫟陽人成帝時病死而尸不寒後忽出櫟南門及光門上而入太白山民為立祠于山嶺春秋來祠中止宿焉山下有太白祠民所祠也劉曜之世是山崩長安人劉終於崩所得白玉方一尺有文字曰皇亡皇亡改趙昌井水竭構五梁罅酉小衰困囂喪嗚呼嗚呼赤

牛奮鞠其盡乎時羣臣畢賀中書監劉均進曰此國
滅之象其可賀乎終如其言矣渭水又東溫泉水注
之溫水出太壹山其水沸涌如湯杜彥達曰可治百
病世清則疾愈世亂則無驗其水下合溪流北注十
三里入渭渭水又東逕蘄縣故城南舊郿城也后稷
之封邑矣詩所謂即有郿家室也城東有姜嫄祠城
西南百步有稷祠郿之蘄亭也王少林之為郿縣也
路經此亭亭長曰亭凶殺人少林曰仁勝凶邪何鬼

敢忤遂宿中夜聞女子稱寃之聲少林曰可前來理
女子曰無衣不敢進少林投衣與之女子前訴曰妾
夫為涪令之官過宿此亭為亭長所殺少林曰當為
理寢寃勿復害良善也因解衣于地忽然不見明告
亭長遂服其事亭遂清安渭水又東逕雍縣

一清按下有脫

文雍山

一清按雍山上當云雍水出雍山漢志右扶風武功縣有淮水祠疑是雍水祠之誤寰宇

記風翔府天興縣下云雍水在縣北二里源出西北平地而李應祥雍勝畧云雍山在鳳翔縣西北三十里雍水出應劭曰四面積高曰雍以其積高故亦可謂之山也關中地勢多積高如風涼原白鹿原斯類

非一又康海武功縣志云雍原即周原
原在岐山下則雍山殆即岐山之支阜乎
東南流歷

中窳溪世謂之中窳水亦曰冰井水南流逕胡城東

俗名也蓋秦惠公之故居所謂祈年宮也孝公又謂
之橐泉宮按地理志曰在雍崔駰曰穆公冢在橐泉
宮祈年觀下劉向曰穆公葬無邱壠處也史記曰穆
公之卒從死者百七十七人良臣子車氏奄息仲行
鍼虎秦人哀之為之賦黃鳥余謂崔駰及皇覽繆志
也惠公孝公並是穆公之後繼世之君矣子孫無由

起宮於祖宗之墳陵矣以是推之知二證之非實也

雍錄曰据郾此言則是惠公所都雍縣有祈年宮至孝公命為橐泉名雖兩出其實一宮也又引崔駰之言

從而辨正其失則是祈年橐泉皆在惠公雍都而亦不知何人所建獨漢書曰惠公所起也黃圖祈為新

且曰穆公造廟記曰宮在城外而始皇本紀則曰在雍皆以世遠難究其的也一清按史記秦本紀云繆

公卒葬雍裴駰集解引皇覽曰秦穆公冢在橐泉宮祈年觀下皇覽魏志以為文帝命劉劭集魏畧以為

王象受詔撰崔駰是漢章帝時人今文止有崔駰之說無皇覽之辭而云知二證之非實蓋有缺失也又

漢志註橐泉宮孝公起祈年宮惠公起是而左會左有二宮也程泰之不知引此所未喻矣

陽水世名之西水北出左陽谿南流逕岐州城西魏

置岐州刺史治左陽水又南流注于雍水雍水又與東水合俗名也北出河桃谷南流右會南源世謂之返眼泉亂流南逕岐州城東而南合雍水州居二水之中南則兩川之交會也世亦名之為淬空水東流鄧公泉注之水出鄧艾祠北故名曰鄧公泉數源俱發於雍縣故城南縣故秦德公所居也晉書地道記以爲西虢地也漢書地理志以爲西虢縣

一清按漢志宏農郡陝縣

下云西虢在雍州而無西虢縣之目右扶風太康記

虢縣有虢宮秦宣太后起此即所謂西虢也

曰號叔之國矣有號宮平王東遷叔自此之上陽為

南號矣

何氏曰按杜預云陝縣東南有號城即是西號國乃號仲所封大陽之下陽城蓋其別都

河東宏農地界相接非兩國也禁陽新鄭之號為號叔所封在陝縣之南故當年號仲之北號亦得西號

之名若右扶風之號與周室二號無與然則善長誤矣方輿紀要云桃號城在寶雞縣東五十里古號君

之支屬也史記秦昭公十年滅小號即此地雍有五矣今有桃號二城相距十餘里俗為桃號川

時祠以上祠祀五帝一清按此注有訛誤地理志云雍有五時祠

百三所郊祀志云秦襄公攻戎救周列為諸侯而居西自以為主少昊之神作西時祀白帝文公東獵汧

渭之間夢黃蛇自天下屬地其口止于廊行於是作廊時用三牲郊祭白帝焉自未作廊時雍旁故有吳

陽武時雍東有好時皆廢而無祀德公卜居雍雍之
諸祀自此與後宣公作密時于渭南祭青帝靈公於
吳陽作上時祭黃帝作下時祭炎帝獻公作畦時
陽而祀白帝高祖立黑帝祠名曰北時除武時好時
非秦所立襄公居西垂宮在隴西則西時非雍可知
文公邠時在邠縣獻公畦時在櫟陽是又不在雍也
雍有五時而言四者顧氏以為燕下文上帝為尊索隱曰雍
有五時而言四者顧氏以為燕下文上帝為尊索隱曰雍
西時邠時皆非雍密時上時下時畦時是為四并高
祖增黑帝而五也小司馬以畦時當雍四時之一而
寰宇記鳳翔府天興縣有三時原引封禪書邠時密
時吳陽上時而云三時在此原亦謂之周原則反遺
却雍之下時矣章懷後漢書馮衍傳註亦但引史記
曰秦并天下祠雍四時漢加黑帝謂之五時而不列
指四時之目其義終莫能明顧祖禹以為五時者邠
密吳陽上下北亦非也又按三時秦時也五時漢時邠

也此三五之名所由分 昔秦文公田于汧渭之間夢黃蛇自天

屬地其口止于廊衍以為上帝之神於是作廊時祠

白帝秦宣公作密時於陳倉北坂祀青帝焉靈公又

於吳陽作上時祀炎帝焉獻公作畦時祀赤帝焉一

按此文與封禪書郊祀志全相乘迺秦宣公作密時于雍不于陳倉北坂在陳倉北坂者是陳寶祠乃文公

作今以陳寶為廊時非矣靈公作吳陽上時祭黃帝作下時祭炎帝索隱曰吳陽地名蓋在岳之南上云

雍有故吳陽武時蓋因武時又作上下時以祭黃帝炎帝今云上時祀炎帝誤也史記櫟陽兩金獻公自

以為得金瑞作畦時櫟陽而祀白帝漢書云祀上帝字之訛也今云祀赤帝赤即炎也更為繆矣 漢

高帝問云天有五帝今何四也博士莫知其故帝曰
我知之矣待我而五遂立北時祀黑帝焉應劭曰四
面積高曰雍闕駟曰宜為神明之隩故立羣祀焉又
有鳳臺鳳女祠秦穆公時有蕭史者善吹簫能致白
鵠孔雀穆公女弄玉好之公為作鳳臺以居之積數
十年一旦隨風去云雍宮世有簫管之聲焉今臺傾
祠毀不復然矣鄧泉東流注于雍自下雖會他津猶
得通稱故禹貢有雍沮會同之文矣

全氏曰善長誤矣豈可以究州

之灘沮釋歧
西之水道乎
雍水又東逕郃亭南世謂之樹亭川蓋

郃樹聲相近誤耳亭故郃公之采邑也京相璠曰亭

在周城南五十里後漢郡國志曰郃縣有郃亭謂此

也一清按詩周南召南譜云周召者禹貢雍州岐山之陽地名今屬右扶風美陽縣史記燕召公世家

註燕周云周之支族食采于召謂之召公索隱曰召者畿內采地爽始食邑于召故曰召公或說者以為

文王受命取岐山之陽故墟名地封爵二公故詩有周南召南言皆在岐山之陽故言南也魏書地形志武功

郡美陽縣有郃亭方輿紀要鳳翔府鳳翔縣有召城亦曰召亭是也而郡國志曰郃有郃亭即上鞮縣鞮

亭也班志云右扶風鞮縣周后稷所封師古曰讀與郃同音胎善長誤記郃作郃以君爽之食采證皇祖

之始封梓繆甚矣王伯厚詩地理攷引注云雍水東遷卽亭南黃本亦是卽字朱氏箋皆改作卽字殆又從而為之 雍水又東南流與杜水合水出杜陽山其解者耶

水南流謂之杜陽川東南流左會漆水水出杜陽縣之漆谿謂之漆渠故徐廣曰漆水出杜陽之岐山者是也漆渠水南流大鬻水注之水出西北大道川東南流入漆即故岐水也淮南子曰岐水出石橋山東

南流相如封禪書曰收龜于岐

朱氏謀璋箋曰漢書作故龜文穎注曰周

放畜餘龜于池沼之中 漢書音義曰岐水名也謂斯至漢得之于岐山之傍

水矣二川并逝俱為一水南與杜水合俗謂之小橫
水亦或名之米流川逕岐山西又屈逕周城南城在
岐山之陽而近西所謂居岐之陽也非直因山致名
亦指水取稱矣又歷周原下北則中水鄉成周聚故

曰有周也

一清按漢志右扶風美陽縣禹貢岐山在西北中水鄉周太王所邑

水北即

岐山矣昔秦盜食穆公馬處也岐水又東逕姜氏城

南為姜水按世本炎帝姜姓帝王世紀曰炎帝神農

氏姜母安登

一清按三皇紀作女登

遊華陽感神而生炎帝長

於姜水合而東逕美陽縣之中亭川水也水發杜陽
縣大嶺側世謂之赤泥峴沿波歷澗俗名大橫水也
疑即杜水矣其水東南流東逕杜陽縣故城東西三
百步南北二百步世謂之故縣川又故號縣有杜陽
山山北有杜陽谷有地穴北入亦不知所極在天柱

山南

寰宇記鳳翔府岐山縣下云岐山亦名天柱山
河圖括地象曰岐山在崑崙山東南為地乳上

多白金周之興也鸞鷲鳴于山上時人亦謂此山為
鳳凰堆注水經云天柱山有鳳凰祠或云其峯高峻
迥出諸山狀若柱因以為名一清按御覽
及程克齋春秋分記並引之今缺失矣

故縣取名

焉亦指是水而攝目矣即王莽之通杜也故地理志

曰縣有杜水

一清按漢志右扶風杜陽縣杜水南入渭詩自杜師古曰大雅綿之詩曰人之

初生自土沮漆齊詩作杜言公又東二坑水注之水

有二源一水出西北與瀆魁水合而東歷五將山又

合鄉谷水水出鄉谿東南流入杜謂之鄉谷川又南

茨水注之一

清按名勝志引注作莫水方輿紀要云莫水亦曰莫谷水寰宇記武功縣下引水

經注云莫谷水逕美陽縣與中水出好時縣梁山

嶺東南逕梁山宮西故地理志曰好時有梁山宮秦

始皇起水東有好畝縣故城王莽之好邑也世祖建武二年封建威大將軍耿弇為侯國又南逕美陽縣之中亭川注雍水謂之中亭水又南逕美陽縣西永

元二年更封鄯雅侯耿秉為侯國

一清按後漢書耿秉傳秉以章和二

年封美陽侯無封鄯雅侯事據前源道縣注云渭水東北流與彭川合東北至彭縣南永元元年和帝封耿秉為侯國是秉先嘗封彭侯後更封美陽足補范書之缺此雍字誤 其水又南流注

于渭渭水又東逕郿塢南漢獻帝傳曰董卓發卒築郿塢高與長安城等積穀為三十年儲自云事成雄

據天下不成守此足以畢老其愚如此渭水又東洛谷之水出其南山洛谷北流逕長城西魏甘露三年蜀遣姜維出洛谷圍長城即斯地也

又東芒水從南來流注之

芒水出南山芒谷北流逕玉女房水側山際有石室世謂之玉女房芒水又北逕蓋屋縣之竹園中分為

二水漢沖帝詔曰翟義作亂於東霍鴻負倚蓋屋芒

竹即此也

日知錄幼主謂之沖帝水經注以孺子嬰為沖帝

其水分為二流

一水之東北為枝流一水北流注于渭也

水經注釋卷十八

欽定四庫全書

水經注釋卷十九

仁和趙一清撰

渭水下

補

豐水

補

涇水

補

芮水

渭水又東過槐里縣南又東澇水從南來注之

渭水逕縣之故城南漢書集註李奇謂之小槐里之
西城也又東與芒水枝流合水受芒水於竹園東北
流又屈而西北入於渭渭水又東北逕黃山宮南即

地理志所謂縣有黃山宮惠帝二年起者也東方朔傳曰武帝微行西至黃山宮故世謂之遊城非也就水注之水出南山就谷北逕大陵西世謂之老子陵昔李耳為周柱下史以世衰入戎於此有家事非經證然莊周著書云老聃死秦失弔之三號而出是非不死之言人稟五行之精氣陰陽有終變亦無不化之理以是推之或復如傳古人許以傳疑故兩存耳就水歷竹圃北與黑水合水上承三泉就水之右三

泉竒發言歸一瀆北流左逕就水就水又北流注於
渭渭水又東合田谿水水出南山田谷北流逕長楊
宮西又北逕蓋屋縣故城西又東北與一水合水上
承蓋屋縣南源北逕其縣東又北逕思鄉城西又北
注田谿田谿水又北流注於渭水也縣北有蒙籠渠
上承渭水於郿縣東逕武功縣為成林渠東逕縣北
亦曰靈軹渠漳渠以引堵水徐廣曰一作諸川是也

一清按漢書地理志云靈軹渠武帝
穿溝洫志注如淳曰韋水出韋谷

渭水又東逕槐

里縣故城南縣古犬丘邑周赧王都之

朱氏謀埠箋曰帝王世紀

及世本並云懿王自鎬徙都秦以為廢邱亦曰舒邱
犬丘此作赧王字之誤耳

和平元年桓帝沈氏曰是靈帝中平封左中郎將皇甫嵩為侯

國縣南對渭水北背通渠史記秦本紀云秦武王三

年渭水赤三日秦昭王三十四年渭水又大赤三日

沈氏曰秦本紀中無此文而漢書五行志引之再考之則武王事見重叙秦世系中而昭王事終佚洪

範五行傳曰赤者火色也水盡赤以火沴水也渭水

秦大川也陰陽亂秦用嚴刑敗亂之象後項羽入秦

封司馬欣為塞王都櫟陽董翳為翟王都高奴章邯
為雍王都廢丘居槐里為三秦漢祖北定三秦引水
灌城遂滅章邯三年改曰槐里王莽更名槐治也世
謂之為大槐里晉太康中始平郡治也其城遮帶防
陸舊渠尚存即漢書所謂槐里環隄者也東有涌水
出南山赤谷東北流逕長楊宮東宮有長楊樹因以
為名涌水又北逕葦圃西亦謂之仙澤又北逕望仙
宮又東北耿谷水注之水發南山耿谷北流與柳泉

合東北逕五柞宮西長楊五柞二宮相去八里並以

樹名宮亦由陶氏以五柳立稱故張晏曰宮有五柞

樹在藍屋縣西其水北逕仙澤東北又逕望仙宮東

又北與赤水會又北逕思鄉城東又北注渭水渭水

又東合甘水水出南山甘谷北逕秦文王薨陽宮西

又北逕五柞宮東又北逕甘亭西在甘水之東鄠縣

昔夏啟伐有扈作誓于是亭故馬融曰甘有扈南郊

地名也

寰宇記鄠縣下引水經注云扈水上承扈陽池一清按此處引有扈以證甘水故知脫文

也於此 甘水又東得澇水口水出南山澇谷北逕漢宜

春觀又東北逕鄠縣故城西澇水際城北出合漢陂

水水出宜春觀北東北流注澇水北流入於渭

一清按說

文澇水出扶風北入渭漢志無澇水也 即上林故地也東方朔稱武帝

建元中微行北至池陽西至黃山南獵長楊東遊宜

春夜漏十刻乃出與侍中常侍武騎待詔及隴西北

地良家子能騎射者期諸殿下故有期門之號旦明

入山下馳射鹿豕狐兔手格熊羆上大驪樂之上乃

使太中大夫虞丘壽王與待詔能用竿者舉籍阿城以南盤屋以東宜春以西提封頃畝及其賈直屬之南山以為上林苑東方朔諫秦起阿房而天下亂因陳秦階六符之事上乃拜太中大夫給事中賜黃金百斤卒起上林苑故相如請為天子遊獵之賦稱烏有先生亡是公而奏上林也

又東豐水從南來注之

地說云渭水又東與豐水會於短陰山內水所會處

無他高山異巖所有唯原阜石激而已水上舊有便

門橋與便門對直武帝建元三年造張昌曰橋在長

安西北茂陵東如淳曰去長安四十里

杭氏世駿曰漢書註張昌

作服虔如淳作蘇林渭水又逕太公廟北廟前有太公碑文字

褫缺今無可尋渭水又東北與鎬水合水上承鎬池

於昆明池北周武王之所都也故詩云考卜維王宅是

鎬京維龜正之武王成之自漢武帝穿昆明池於是

地基構淪褫今無可究

雍錄曰諸家皆言自漢武帝穿昆明池後鎬京故基皆淪

入于池無復可究獨梁載言十道志曰鎬池一名元
趾在昆明池北始皇毀之寰宇記云鎬泉在華陰縣
東十九里其水或涌或止深不可測括地圖云是河眼亦謂之鎬池春秋後傳曰使者

鄭容入栢谷關至平舒置見華山有素車白馬問鄭

容安之答曰之咸陽車上人曰吾華山君使願託書

致鄙池君子之咸陽過鄙池見大梓下有文石取以

欸扣梓當有應者以書與之勿妄發致之得所欲鄭

容行至鄙池見一梓下果有文石取以欸梓應曰諾

鄭容如睡覺而見宮闕若王者之居焉謁者出受書

入又見頃聞語聲言祖龍死神道茫昧理難辨測故
無以精其幽致矣郃水又北流西北注與滌池合水
出郃池西而北流入於郃毛詩云滌流浪也而世傳
以為水名矣鄭元曰豐鎬之間水北流也郃水北逕

谿靈臺西

一清按谿靈臺谿字誤也朱氏謀埜箋云
宋本作漢靈臺竊謂似是而實非也御覽

及長安志引此文作清冷臺與今本異宋氏家多古
書未必無據魏書地形志京兆郡長安縣有周靈臺
方輿紀要長安縣靈臺下引三輔故事曰周靈臺在
鄠縣豐水東鄠縣鄠城下云左傳昭四年楚椒舉曰
康有鄠宮之朝杜預曰鄠宮有靈臺康王于是朝諸
侯孔穎達曰豐去長安郃池二十五里又曰靈臺在

縣東北周靈臺也志云鄠宮又東二十五里即靈囿之地中有靈臺詩所謂經始靈臺者也春秋僖十五年秦晉戰于韓獲晉侯以歸舍諸靈臺是也又曰三輔故事曰漢靈臺在長安故城西北八里本秦之清臺漢曰靈臺郭緣生述征記長安宮中有靈臺高十五仞水經注漢靈臺在秦阿房宮南去明堂三百步鎬水逕其西漢平帝元始四年立觀此則豐宮之靈臺為周而長安之靈臺為漢酈注既于長安城下記漢靈臺矣于此又云漢靈臺不幾復與寰宇記引水經注作清靈臺是也蓋清臺之石不始于秦康志賀述禮統云夏為清臺高為神臺周為靈臺毛公詩傳曰神之清明稱靈四方而高曰臺且亦有清靈合稱者史記封禪書公孫卿曰黃帝就青靈臺十二日燒也黃囿曰漢靈臺在長安西北八里又周文王靈臺在長安西北四十里高二十丈周四百二十步明有周漢之分呂囿亦云漢舊城外有靈臺北與未央宮

對此即漢靈臺與鄴宮之靈臺無涉也中尉知改銘
字之誤而不知漢字之亦屬臆說與事義大相乖舛
者也玉海引水經注曰鄴水北逕靈臺西文王又引
水為辟廱靈沼此等文句今皆脫失無惑乎後人之
但憑私見也

又逕磁石門西門在阿房前悉以磁石為之

故專其目令四夷朝者有隱甲懷刃入門而脅之以
示神故亦曰却胡門也鄠水又北注於渭渭水北有
杜郵亭去咸陽十七里今名孝里亭中有白起祠嗟
乎有制勝之功慙尹商之仁是地即其伏劍處也渭
水又東北逕渭城南文頴以為故咸陽矣秦孝公之

所居離宮也獻公都櫟陽天雨金周太史儋見獻公
曰周故與秦國合而別別五百歲復合合七十歲而
霸王出至孝公作咸陽築冀闕而徙都之故西京賦
曰秦里其霸實為咸陽太史公曰長安故咸陽也漢
高帝更名新城武帝元鼎三年別為渭城在長安西
北渭水之陽王莽之京城也始隸扶風後并長安而

沈水注之

一清按沈字是沈字之誤地理志右扶風鄠縣下云滴水北過上林苑入渭師古曰

滴即今沈水字或作沈與沈字相似因名沈水滴水今則改名人不識也然則沈字之訛所由來舊矣

其水上承皇子陂於樊川其地即杜之樊鄉也漢祖
至櫟陽以將軍樊噲灌廢丘最賜邑于此鄉也其水西
北流注杜縣之杜京西西北流逕杜伯冢南杜伯與
其友左儒仕宣王儒無罪見害杜伯死之終能報恨
于宣王故成公子安五言詩曰誰謂鬼無知杜伯射
宣王沈水又西北逕下杜城即杜伯國也沈水又西
北支合故渠渠有二流上承交水合於高陽原而北
逕河池陂東而北注沈水沈水又北與昆明故池會

又北逕秦通六基東又北逕塌水坡東又北得坡承
其陂東北流入於沈水沈水又北逕長安城西與昆
明池水合水上承池於昆明臺故王仲都所居也桓
譚新論稱元帝被病廣求方士漢中送道士王仲都
詔問所能對曰能忍寒暑乃於盛寒日載以駟馬車
於昆明池上環水而馳御者厚衣狐裘寒戰而仲都
獨無變色臥于池臺上曛然自若夏大暑日使暴坐
環以十爐火不言熱又身不汗池水北逕鎬京東秦

阿房宮西史記曰秦始皇三十五年以咸陽之人多
先王之宮小乃作朝宮于渭南亦曰阿城也始皇先
作前殿阿房上可坐萬人下可建五丈旗周馳為閣
道自殿直抵城南山表山巔為闕為複道自阿房度
渭屬之咸陽象天極闕道絕漢抵營室也關中記曰
阿房殿在長安西南二十里殿東西千步南北三百
步庭中受十萬人其水又屈而逕其北東北流注竭
水陂陂水北出逕漢武帝建章宮東於鳳闕南東注

沈水又北逕鳳闕東三輔黃圖曰建章宮漢武帝造
周二十餘里千門萬戶其東鳳闕高七丈五尺俗言
貞女樓非也漢武帝故事云闕高二十丈闕中記曰
建章宮圓闕臨北道有金鳳在闕上高大餘故號鳳
闕也故繁欽建章鳳闕賦曰秦漢規模廓然毀泯唯
建章鳳闕巋然獨存雖非象魏之制亦一代之巨觀
也沈水又北分為二水一水東北流一水北逕神明
臺東傅子宮室曰上于建章中作神明臺并榦樓咸

高五十餘丈皆作懸閣輦道相屬焉三輔黃圖曰神明臺在建章宮中上有九室今人謂之九子臺而其實非也沈水又逕漸臺東漢武故事曰建章宮北有太液池池中有漸臺高三十丈漸浸也為池水所漸一說星名也南有璧門三層高三十餘丈中殿十二間階陛咸以玉為之鑄銅鳳五丈飾以黃金樓屋上椽首薄以玉璧因曰璧玉門也沈水又北流注渭亦謂是水為涵水也故呂忱曰涵水出杜陵縣漢書音

義曰涵水聲而非水也亦曰高都水前漢之末五侯
王氏大治池沼引沈水入長安城故百姓歌之曰五
侯初起曲陽最怒壞決高都竟連五杜土山漸臺象
西白虎即是水也

又東過長安縣北

渭水東分為二水廣雅曰水自渭出為漿其由河之
有雍也此瀆東北流逕魏雍州刺史郭淮碑南又東
南合一水逕兩石人北秦始皇造橋鐵鍬重不勝故

刻石作力士孟賁等像以祭之鐵乃可移動也又東
逕陽侯祠北漲輒祠之此神能為大波故配入河伯
也後人以為鄧艾祠悲哉讒勝道消專忠受害矣渭
水又東注此水水上有梁謂之渭橋秦制也亦曰便
門橋秦始皇作離宮於渭水南北以象天宮故三輔
黃圖曰渭水貫都以象天漢橫橋南度以法牽牛南
有長樂宮北有咸陽宮欲通二宮之間故造此橋廣
六丈南北三百八十步六十八間七百五十柱一百

二十二梁橋之南北有隄激立石柱柱南京兆主之
柱北馮翊主之有令丞各領徒一千五百人橋之北
首壘石水中故謂之石柱橋也舊有忖留神像此神
嘗與魯班語班令其神出忖留曰我貌瘠醜卿善圖
物容我不能出班于是拱手與言曰出頭見我忖留
乃出首班于是以脚畫地忖留覺之便還沒水故置
其像於水唯背以上立水上後董卓入關遂焚此橋
魏武帝更修之橋廣三丈六尺忖留之像曹公乘馬

見之驚又命下之燕丹子曰燕太子丹質于秦秦王
遇之無禮乃求歸秦王為機發之橋欲以陷丹丹過

之橋不為發又一說交龍捧舉而機不發但言朱氏謀

箋曰謝云疑有脫誤今不知其故處矣渭水又東與沈水枝津

合水上承沈水東北流逕鄧艾祠南又東分為二水

一水東入逍遙園注蕩池池中有臺觀蓮荷被浦秀

實可翫其一水北流注于渭渭水又東逕長安城北

漢惠帝元年築六年成一清按漢書惠帝紀元年城長安三年春發長安六百

內男子十四萬六千人城長安三十日罷法鄭氏曰城一面故速罷又五年九月長安城成六年起長安西市也而史記呂后紀云惠帝三年方築城四年就半五年六年城就索隱曰漢宮闕疏四年築東面五年築北面漢舊儀城方六十三里經緯各十二里三輔舊事云城形似北斗也即咸陽也秦

離宮無城故城之王莽更名長安十二門東出北頭

第一門本名宣平門王莽更名春王門正月亭亦曰

東城門其郭門亦曰東都門

一清按漢書王莽傳無東字

即逢萌

挂冠處也第二門本名清明門一曰凱門王莽更曰

宣德門布思亭內有藉田倉亦曰藉田門第三門本

名霸城門王莽更名仁壽門無疆亭民見門色青又
名青城門或曰青綺門亦曰青門門外舊出佳瓜昔
廣陵人邵平為秦東陵侯秦破為布衣種瓜此門瓜
美故世謂之東陵瓜是以阮籍詠懷詩曰昔聞東陵
瓜近在青門外連畛拒阡陌子母相鉤帶指謂此門
也南出東頭第一門本名覆盎門王莽更名永清門
長茂亭其南有下杜城應劭曰故杜陵之下聚落也
故曰下杜門又曰端門北對長樂宮第二門本名安

門亦曰鼎路門王莽更名光禮門顯樂亭即西安亭
北對未央宮第三門本名平門王莽更名信平門誠
正亭西出南頭第一門本名章門王莽更名萬秋門
億年亭亦曰故光畢門也又曰便門第二門本名直
門王莽更名直道門端路亭故龍樓門也張晏曰門
樓有銅龍三輔黃圖曰長安西出第二門即此門也
第三門本名西城門亦曰雍門王莽更名章義門著
誼亭其水北入有函里氏名曰函里門又曰光門亦

曰突門

一清按此西出之第三門也曰光門而北出西頭第一門曰橫門亦曰光門二門不應相

同也程大昌曰以黃圖考之長安城北面從西數來第一門名橫門門外有橋曰橫橋呂相長安圖

亦同又黃圖長安有九市其三在道東東市在突門夾橫橋大道水經曰光門亦名突門在長安西從

南來第三門正與黃圖呂圖之謂橫門者隅角相次故黃圖呂圖之謂在北者即與水經之謂突門光門

為在城西面者相應也今北出西頭第一門本名橫去古遠不敢以何為定

門王莽更名霸都門左幽亭如淳曰音光故曰光門

其外郭有都門有棘門徐廣曰棘門在渭北孟康曰

在長安北秦之宮門也如淳曰三輔黃圖曰棘門在

橫門外按漢書徐厲軍於此備匈奴又有通門亥門也其第二門本名洛門又曰朝門王莽更名建子門廣世亭一曰高門蘇林曰高門長安城北門也一曰厨門其內有長安厨宮在東故名曰厨門也如淳曰今名廣門也第三門本名杜門亦曰利城門王莽更名進和門臨水亭其外有客舍故名曰客舍門又曰洛門也凡此諸門皆通達九達三途洞開隱以金椎周以林木左出右入為往來之逕行者升降有上下

之別漢成帝之為太子元帝嘗急召之太子出龍樓
門不敢絕馳道西至直城門方乃得度上怪遲問其
故以狀對上悅乃著令令太子得絕馳道也渭水東
合昆明故渠渠上承昆明池東口東逕河池陂而北
亦曰女觀陂又東合沈水亦曰漕渠又東逕長安縣
南東逕明堂南舊引水為辟雍處在甬路門東南七
里其制上圓下方九宮十二堂四嚮五室堂北三百
步有靈臺是漢平帝元始四年立渠南有漢故圓邱

成帝建始二年罷雍五畤始祀皇天上帝于長安南郊應劭曰天郊在長安南即此也故渠之北有白亭博望苑漢武帝為太子立使通賓客從所好也太子巫蠱事發斫杜門東出史良娣死葬于苑北宣帝以為戾園以倡優十人樂思后園廟故亦曰千鄉故渠又東而北屈逕青門外與沈水枝渠會渠上承沈水於章門西飛渠引水入城東為倉池池在未央宮西池中有漸臺漢兵起王莽死于此臺又東逕未央宮

北高祖在闕東令蕭何成未央宮何斬龍首山而營
之山長六十餘里頭臨渭水尾達樊川頭高二十丈
尾漸下高五六丈土色赤而堅云昔有黑龍從南山
出飲渭水其行道因山成跡山即基闕不假築高出
長安城北有元武闕即北闕也東有蒼龍闕闕內有
閭闔止車諸門未央殿東有宣室玉堂麒麟含章白
虎鳳凰朱雀鸞鷲昭陽諸殿天祿石渠麒麟三閣未
央宮北即桂宮也周十餘里內有明光殿走狗臺栢

梁臺舊乘複道用相逕通故張衡西京賦曰鈎陳之外閣道穹窿屬長樂與明光逕北通于桂宮故渠出二宮之間謂之明渠也又東歷武庫北舊樛里子葬于此樛里子名疾秦惠王異母弟也滑稽多智秦人號曰智囊葬於昭王廟西渭南陰鄉樛里故俗謂之樛里子云我百歲後是有天子之宮夾我墓穴以昭王七年卒葬于渭南章臺東至漢長樂宮在其東未央宮在其西武庫直其墓秦人嘖曰力則任鄙智則

栲里也明渠又東逕漢高祖長樂宮北本秦之長樂宮也周二十里殿前列銅人殿西有長信長秋永壽永昌諸殿殿之東北有池池北有層臺俗謂是池為酒池非也故渠北有樓豎漢京兆尹司馬文預碑故渠又東出城分為二渠即漢書所謂王渠者也蘇林曰王渠官渠也猶今御溝矣晉灼曰渠名也在城東霸門外一水逕楊橋下即青門橋也側城北逕鄧艾祠西而北注渭今無水其一渠東逕奉明縣廣成鄉

之廣明苑南史皇孫及王夫人葬于郭北宣帝遷苑
南卜以為悼園蓋園民千六百家立奉明縣以奉二
園園在東都門昌邑王賀自霸御法駕郎中令龔遂
駝乘至廣明東都門是也故渠東北逕漢太尉夏侯
嬰冢西英日樞馬悲鳴輕車閤進下得石柳銘云于
嗟滕公居此室故遂葬焉冢在城東八里飲馬橋南
四里故時人謂之馬冢

又東過霸陵縣北霸水從縣西北流注之

霸者水上地名也古曰滋水矣秦穆公霸世更名滋水為霸水以顯霸功水出藍田縣藍田谷所謂多玉者也西北有銅谷水次東有輞谷水二水合而西注

之又西流入渥水

長安志劉谷水一名泥水引水經注曰水出藍田之東谷俗謂之劉

谷西北與石門水合又石門谷水東有銅谷水合輞谷水西注泥水今本無之一清按輞谷水是輞谷水

之渥水又西逕峽關北歷柳峽城東西有二城魏置

清渥軍于城內世亦謂之清渥城也秦二世三年漢祖入自武關攻秦趙高遣將拒於峽關者也土地記

曰藍田縣南有峽關地名峽柳道通荊州晉地道記

曰關當上洛縣西北渥水又西北流入霸

一清按漢志京北南

陵縣沂水出藍田谷北至霸陵入霸水而是注渥水源流正與坵園所稱沂水合沂渥音同觀宋敏求引

注佚文可見師古音沂為先歷反蓋誤耳而道元引漢志則以澹水當之霸水又北歷藍

田川逕藍田縣北竹書紀年梁惠成王三年秦子向

命為藍君蓋子向之故邑也川有漢臨江王榮冢景

帝以罪徵之將行祖于江陵北門車軸折老父泣曰

吾王不反矣榮至中尉郢都急切責王王年少恐而

自殺葬于是川有鵞數萬銜土置冢上百姓矜之霸
水又左合澹水歷白鹿原東即霸川之西故芷陽矣

史記秦襄王葬芷陽者是也

一清按史記秦始皇紀重
叙秦世系云昭襄享國五

十六年葬陸陽索隱曰十九年而立葬芷陵也芷與
陸同此是昭襄王之陵而其孫莊襄王亦葬陸陽即
楚陵也謂之霸上漢文帝葬其上謂之霸陵上有四

出道以瀉水在長安東南三十里故王仲宣賦詩云
南登霸陵岸回首望長安漢文帝嘗欲從霸陵上西
馳下峻坂袁盎攬轡於此處上曰將軍怯也盎曰臣

聞千金之子坐不垂堂百金之子立不倚衡聖人不
乘危今馳不測如馬驚車敗奈高廟何上乃止霸水
又北長水注之水出杜縣白鹿原其水西北流謂之
荆谿荆谿水又西北左合狗枷川水水有二源西川
上承礪山之斫槃谷次東有苦谷二水合而東北流
逕風涼原西關中圖曰麗山之西川中有阜曰風涼
原在礪山之陰雍州之福地即是原也其水傍谿北
注原上有漢武帝祠其水右合東川水出南山之石

門谷次東有孟谷次東有大谷次東有雀谷次東有
土門谷五水北合而北歷風涼原又北與西川會原
為二水之會亂流北逕宣帝許后陵東而北去杜陵
十里斯川於是有狗枷之名川東亦曰白鹿原也上
有狗枷堡三秦記曰麗山西有白鹿原原上有狗枷

堡秦襄公時有天狗來下有賊則狗吠之故一堡無

患故川得厥目焉

一清按北齊書昭帝紀云時有天狗下亦其類也山海經有獸亦名

天狗焉西山經曰陰山有獸焉其狀如狸而白首名曰天狗其音榴榴可以禦凶吳任臣廣註引事物紺

珠云天狗如狸白首音如貓食蛇

川水又北逕杜陵東元帝初元元

年葬宣帝杜陵北去長安五十里陵之西北有杜縣故城秦武公十一年縣之漢宣帝元康元年以杜東原上為初陵更名杜縣為杜陵也王莽之饒安也其水又北注荆谿荆谿水又北入霸水又有溫泉入焉水發自亭下入荆谿水亂流注于霸俗謂之澆水非也史記音義文帝出安門注云在霸陵縣有故亭即郡國志所謂長門亭也史記云霸澆長水也雖不在

祠典以近咸陽秦漢都涇渭長水盡得比大川之禮

一清按史記封禪書云霸產長水澧潏涇渭皆非大川以近咸陽盡得比山川祠今注云云是抄變其詞而

失其義也昔文公居霸陵北臨厠指新豐路示慎夫人曰

此走邯鄲道也因使慎夫人鼓瑟上自倚瑟而歌悽

愴悲懷顧謂羣臣曰以北山石為槨用絮斲陳漆其

間豈可動哉釋之曰使其中有可欲雖錮南山猶有

隙使無可欲雖無郭又何戚焉文帝曰善拜廷尉韋

昭曰高岸夾水為厠今斯原夾二水也霸水又北會

兩川又北故渠左出焉霸水又北逕王莽九廟南王莽地皇元年博徵天下工匠壞撤西苑建章諸宮館十餘所取材瓦以起九廟竿及吏民以義入錢穀助成九廟廟殿皆重屋太初祖廟東西南北各四十大高十七丈餘廟半之為銅薄櫨飾以金銀鵬文窮極百工之巧褫高增下功費數百巨萬卒死者萬數霸水又北逕枳道在長安縣東十三里王莽九廟在其南漢世有白鷺羣飛

何氏曰亭林云當作白蛾一清按事見漢書元帝紀建昭元年

也自東都門過于枳道呂后被除于霸上還見倉狗
擗骨于斯道也水上有橋謂之霸橋地皇三年霸橋
木災自東起卒數千以水汎沃救不滅晨熾夕盡王
莽惡之下書曰甲午火橋乙未立春之日也予以神
明聖祖黃虞遺統受命至於地皇四年為十五年正
以三年終冬絕滅霸駁之橋欲以興成新室統一長
存之道其名霸橋為長存橋霸水又北左納漕渠絕
霸右出焉東逕霸城北又東逕子楚陵北皇甫謐曰

秦莊王葬于芷陽之麗山京兆東南霸陵山劉向曰

莊王大其名立墳者也戰國策曰莊王字異人更名

子楚故世人猶以子楚名陵

一清按史記始皇之父為莊襄王索隱以為葬

陽陵寰宇記雍州萬年縣下云霸岸在通化門東二十里秦襄王葬于其坂謂之霸上其城即秦繆公所

築漢為縣在東北二十三里霸水東霸陵故城是也東向至漢文帝陵十里

又東逕新豐

縣右會故渠上承霸水東北逕霸城縣故城南漢文

帝之霸陵縣也王莽更之曰水章魏文帝黃初元年

何氏曰文當作明黃當作景事見三國志魏明帝紀注中然後漢書方術傳注引此正同豈唐初所傳之

本已訛謬不可讀耶書不經劉徙長安金狄重不可
向揚雄之手其孰為是正哉

致因留霸城南人有見薊子訓與父老共摩銅人曰
正見鑄此時計爾日以近五百年矣故渠又東北逕
劉更始冢西更始二年為赤眉所殺故侍中劉恭夜
往收而埋之光武使司徒鄧禹收葬于霸陵縣更始
尚書僕射行大將軍事鮑永持節安集河東聞更始
死歸世祖累遷司隸校尉行縣逕更始墓遂下拜哭
盡哀而去帝問公卿太中大夫張湛曰仁不遺舊忠

不忘君行之高者帝乃釋之又東北逕新豐縣右合
漕渠漢大司農鄭當時所開也以渭難漕命齊水工
徐伯乃發卒穿渠引渭合渠自昆明池南傍山原東
至于河且田且漕大以為便霸水又北逕秦虎圈東
列士傳曰秦昭王會魏王魏王不行使朱亥奉璧一
雙秦王大怒置朱亥虎圈中亥瞋目視虎皆裂血出
濺虎虎不敢動即是處也霸水又北入于渭水渭水
又東會成國故渠渠魏書左僕射衛臻征蜀所開也

號成國渠引以澆故田

一清按漢志郿縣成國渠北至上林入蒙籠渠蓋西京已

有是渠衛公振更修治之耳

其瀆上承泝水於陳倉東逕郿及

武功槐里縣北渠左有安定梁巖冢碑碣尚存又逕

漢武帝茂陵南故槐里之茂鄉也應劭曰武帝自為

陵在長安西北八十餘里漢武帝故事曰帝崩後見

形謂陵令薛平曰吾雖失勢猶為汝君奈何令吏卒

上吾陵磨刀劍乎自今以後可禁之平頓首謝因不

見推問陵傍果有方石可以為礪吏卒常盜磨刀劍

霍光欲斬之張安世曰神道茫昧不宜為法乃止故
阮公詠懷詩曰失勢在須臾帶劍上吾丘陵之西南
如此一里即李夫人冢冢形三成世謂之英陵夫人
兄延年知音尤善歌舞帝愛之每為新聲變曲聞者
莫不感動嘗侍上起舞歌曰北方有佳人絕世而獨
立一顧傾人城再顧傾人國寧不知傾城復傾國佳
人難再得上曰世豈有此人乎平陽主曰延年女弟
上召見之妖麗善歌舞得幸早卒上憫念之以后禮

莫悲思不已賦詩悼傷故渠又北分為二渠東逕虎
園南而東入霸一水北合渭今無水故渠又東逕茂
陵縣故城南武帝建元二年置地理志曰宣帝縣焉
王莽之宣城也故渠又東逕龍泉北今人謂之溫泉
非也渠北故坂北即龍淵廟如淳曰三輔黃圖有龍
淵宮今長安城西有其廟處蓋宮之遺也故渠又東
逕姜原北渠北有漢昭帝平陵東南去長安七十里
又東逕平陵縣故城南地理志曰昭帝置王莽之廣

利也故渠之南有竇氏泉北有徘徊廟又東逕漢大將軍魏其侯竇嬰冢南又東逕成帝延陵南陵之東北五里即平帝康陵坂也故渠又東逕渭陵南元帝

永光四年以渭城壽陵亭原上為初陵詔不立縣邑

又東逕哀帝義陵南又東逕惠帝安陵南陵北有安

陵縣故城也地理志曰惠帝置王莽之嘉平也渠側

有杜郵亭又東逕渭城北地理志曰縣有蘭池宮秦

始皇微行逢盜于蘭池今不知所在也

雍錄曰咸陽縣東二十五

里蘭池陂即始皇遇盜之地漢於其北立池陽縣一
清按漢志左馮翊池陽縣應劭曰在池水之陽劉昭
郡岡志補注引三秦記曰始皇引渭水為長池東
西二百里南北三十里刻石為鯨魚長二百丈又

東逕長陵南亦曰長山也三秦記曰長安城北有平

原廣數百里民井汲巢居井深五十丈秦名天子冢

曰山漢曰陵故通曰山陵矣風俗通曰陵者天生自

然者也今王公墳壠稱陵春秋左傳曰南陵夏后臯

之墓也春秋說題辭曰丘者墓也冢者種也種墓也

羅倚於山分卑尊之名者也故渠又東逕漢丞相周

勃冢南冢北有亞夫冢故渠東南謂之周氏曲又東
南逕漢景帝陵南又東南注于渭今無水渭水又東
逕霸城縣北與高陵分水水南有定陶恭王廟傅太
后陵元帝崩傅昭儀隨王歸國稱定陶太后後十年
恭王薨子代為王徵為太子太子即帝位立恭王寢
廟于京師比宣帝父悼皇故事元壽元年傅后崩合
葬渭陵潘岳關中記漢帝后同塋則為合葬不共陵
也諸侯皆如之恭王廟在霸城西北廟西北即傅太

后陵不與元帝同塋渭陵非謂元帝陵也蓋在渭水之南故曰渭陵也陵與元帝齊者謂同十二丈也王莽奏毀傅太后冢冢崩壓殺數百人開棺梟聞數里公卿在位皆阿莽旨入錢帛遣子弟及諸生四夷凡十餘萬人操持作具助將作掘傅后冢二旬皆平周棘其處以為世戒今其處積土猶高世謂之增塹又亦謂之增阜俗亦謂之成帝初陵處所未詳也渭水又逕平阿侯王譚墓北冢次有碑左則涇水注之渭

水又東逕鄠縣西蓋隴西郡之鄠徙也渭水又東得
白渠枝口又東與五大渠合水出雲陽縣石門山謂
之清水東南流逕黃嶽山西又南入葭州縣歷原南
出謂之清水口東南流絕鄭渠又東南入高陵縣逕
黃白城西本曲梁宮也南絕白渠屈而東流謂之曲
梁水又東南逕高陵縣故城北東南絕白渠瀆又東
南入萬年縣謂之五大渠又逕蕩原東東南流注于
渭渭水右逕新豐縣故城北東與魚池水會水出麗

山東北水本導源東流後秦始皇葬于山北水過而
曲行東注北轉始皇造陵取土其地汙深水積成池
謂之魚池池在秦皇陵東北五里周圍四里池水西
北流逕始皇冢北秦始皇大興厚葬營建冢壙於麗
戎之山一名藍田其陰多金其陽多玉始皇貪其美
名因而莫焉斬山鑿石下錮三泉以銅為柳旁行週
迴三十餘里上畫天文星宿之象下以水銀為四瀆
百川五嶽九州具地理之勢宮觀百官竒器珍寶充

滿其中令匠作機弩有所穿近輒射之以人魚膏為
燈燭取其不滅者久之後宮無子者皆使殉葬甚眾
墳高五大周迴五里餘作者七十萬人積年方成而
周章百萬之師已至其下乃使章邯領作者以禦難
弗能禁項羽入關發之以三十萬人三十日運物不
能窮關東盜賊銷櫛取銅牧人尋羊燒之火延九十
日不能滅北對鴻門十里池水又西北流水之西南
有溫泉世以療疾三秦記曰麗山西北有溫水祭則

得入不祭則爛人肉俗云始皇與神女遊而忤其旨
神女唾之生瘡始皇謝之神女為出温水後人因以
澆洗創張衡温泉賦序曰余出麗山觀温泉浴神井
嘉洪澤之普施乃為之賦云此湯也不使灼人形體
矣池水又逕鴻門西又逕新豐縣故城東故麗戎地
也高祖王闕中太上皇思東歸故象舊里制茲新邑
立城社樹粉榆令街庭若一分置豐民以實茲邑故
名之為新豐也漢靈帝建寧三年改為都鄉封段熲

為侯國

一清按漢承秦制十里一亭十亭一鄉都亭都鄉所以統一縣之鄉亭者後漢書本傳段

頰初封都鄉侯更封新豐縣侯非改新豐為都鄉也後立陰槃城其水際北城

世謂是水為陰槃水又北絕漕渠注于渭渭水又東

逕鴻門北舊大道北下坂口名也古有鴻門亭漢書

高祖將見項羽楚漢春秋曰項王在鴻門亞父曰吾

使人望沛公其氣衝天五色相繆或似龍或似雲非

人臣之相可誅之漢高祖會項羽范增目羽羽不應

樊噲杖盾撞人入食豕肩於此羽壯之郡國志曰新

豐縣東有鴻門亭者也郭緣生曰或云霸城南門曰鴻門也項羽將因會危高祖羽仁而弗斷范增謀而不納項羽終護高祖以護免既抵霸上遂封漢王按漢書注鴻門在新豐東十七里則霸上應百里按史記項伯夜馳告張良良與俱見高祖仍使夜返考其道里不容得爾今父老傳在霸城南門數十里於理為得按緣生此記雖歷覽史漢述行涂經見可謂學而不思矣今新豐縣故城東三里有坂長二里餘塹

原通道南北洞開有同門狀謂之鴻門孟康言在新
豐東十七里蓋指縣治而言非謂城也自新豐故城
西至霸城五十里霸城西十里則霸水西二十里則
長安城應劭曰霸水上地名在長安東二十里即霸
城是也高祖舊停軍處東去新豐既遠何由項伯夜
與張良共見高祖乎推此言之知緣生此記乖矣渭
水又東石川水南注焉渭水又東戲水注之水出麗
山馮公谷東北流又北逕麗戎城東春秋晉獻公五

年伐之獲麗姬於是邑麗戎男國也姬姓秦之麗邑
矣又北右總三川逕鴻門東又北逕戲亭東應劭曰
戲宏農湖縣西界也地隔諸縣不得為湖蘓林曰戲
邑名在新豐東南三十里孟康曰乃水名也今戲亭
是也昔周幽王悅褒姒不笑王乃擊鼓舉烽以徵
諸侯至無寇褒姒乃笑王甚悅之及犬戎至王又舉
烽以徵諸侯諸侯不至遂敗幽王於戲水之上身死
於麗山之北故國語曰幽滅者也漢成帝建始二年

造延陵為初陵以為非吉于霸曲亭南更營之鴻嘉
元年于新豐戲鄉為昌陵縣以奉初陵永始元年詔
以昌陵卑下容土踈惡不可為萬歲居其罷陵作令

吏民反故徒將作大匠解延年一清按漢書作解萬年燉煌關

中記曰昌陵在霸城東二十里取土東山與粟同價
所費巨萬積年無成即此處也戲水又北分為二水

並注渭水渭水又東泠水入焉水南出肺浮山一清按長

安志曰水經曰浮肺山一作肺浮是舊本
原作浮肺今本乃後人據他書更易耳蓋麗山連

麓而異名也北會三川統歸一壑歷陰槃新豐兩原之間北流注于渭渭水又東首水南出倒虎山西總五水單流注逕秦步高宮東世名市丘城歷新豐原東而北逕步壽宮西又北入渭渭水又東得西陽水又東得東陽水並南出廣鄉原北垂俱北入渭渭水又東逕下邳縣故城南秦伐邳置邳戎於此有上邳故如下也渭水又東與竹水合南出竹山北逕媚加谷歷廣鄉原東俗謂之大赤水北流注于渭渭水又

東得白渠口太始二年趙國中大夫白公奏穿渠引
涇水首起谷口出於鄭渠南名曰白渠民歌之曰田
于何所池陽谷口鄭國在前白渠起後即水所始也
東逕宜春城南又東南逕池陽城北枝瀆出焉東南
逕蕩原下逕鄠縣故城北東南入渭今無水白渠又
東枝渠出焉東南逕高陵縣故城北地理志曰左輔
都尉治王莽之千春也太康地記謂之曰高陸也車
頓秦書曰苻堅建元十二年高陸縣民穿井得龜大

二尺六寸背文負八卦古字堅以石為池養之十六年而死取其骨以問吉凶名為客龜太卜佐高夢客龜言我將歸江南不遇死于秦高於夢中自解曰龜三萬六千歲而終終必亡國之徵也為謝元破於淮肥自縊新城浮圖中秦祚因即淪矣又東逕櫟陽城北史記秦獻公二年城櫟陽自雍徙居之十八年雨金于是處也項羽以封司馬欣為塞王按漢書高帝克關中始都之王莽之師亭也後漢建武二年封驃

騎大將軍景丹為侯國丹讓世祖曰富貴不還故鄉
如衣錦夜行故以封卿白渠又東逕秦孝公陵北又
東南逕高陵城北蓮勺城南又東注金氏陂又東南
注于渭故漢書溝洫志曰渠首起谷口尾入櫟陽是
也今無水

又東過鄭縣北

渭水又東逕巒都城北故蕃邑殷契之所居世本曰
契居蕃闕駟曰蕃在鄭西然則今巒城是矣俗名之

赤城水曰赤水非也苻健入秦據此城以抗杜洪小
赤水即山海經之灌水也水出石脆之山北逕蕭加
谷於孤栢原西東北流與禺水合水出英山北流與
招水相得亂流西北注于灌灌水又北注于渭渭水
又東西石橋水南出馬嶺山積石據其東麗山距其
西源泉上通懸流數十與華岳同體其水北逕鄭城
西水上有橋橋雖崩褫舊跡猶存東去鄭城十里故
世以橋名水也而北流注于渭關駟謂之新鄭水渭

水又東逕鄭縣故城北史記秦武公十年縣之鄭桓公友之故邑也漢書薛瓚注言周自穆王已下都於西鄭不得以封桓公也幽王既敗虢檜又滅遷居其地國于鄭父之丘是為鄭桓公無封京兆之文余按史記考春秋國語世本言周宣王二十二年封庶弟友于鄭又春秋國語並言桓公為周司徒以王室將亂謀又史伯而寄幣于虢檜之間幽王賈于戲鄭桓公死之平王東遷鄭武公輔王室滅虢檜而兼其土

故周桓公言于王曰我周之東遷晉鄭是依乃遷封于彼左傳隱公十一年鄭伯使公孫獲曰吾先君新邑于此其能與許爭乎是其指新鄭為言矣然班固應劭鄭元皇甫謐裴頠王隱闕駟及諸述作者咸以西鄭為友之始封也賢于薛瓚之單說也無宜違正經而從逸錄矣赤眉樊崇于鄭北設壇祀城陽景王而尊右校卒史劉俠卿牧牛兒盆子為帝年十五被髮徒跣為具絳單衣半頭赤幘直綦履顧見衆人拜

恐畏欲唬號年建世後月餘乘白蓋小車與崇及尚書一人相隨向鄭北渡渭水即此處也城南山北有

五部神廟東南向華岳廟前有碑後漢光初四年鄭

縣令河東裴畢字君先立

一清按五部神廟碑洪氏迺隸釋作散阮君神祠碑

其辭曰天地交位凶闕七嶽瀆諸侯闕事其細闕祭法曰凶林川谷有並於民闕二左祀典夫中條之凶

者蓋華嶽之體也石殿樹谷南通商雒以屬熊耳百川鍾集充崖滿谷時有盛雨彭漢涌溢乘高趨下揚

波跳沫於是散既以為之寅承寫其流北注諸渭闕深濡暴使不為害前世通利夫氏興貴有御史大夫

將軍牧伯故為立祠以報其功自亡新已來其祀賸廢暗指堙塞睨眄沮潰漂沒田疇滯敗亭市神怒民

怨縣遂以窳賤仕宦失官踣弊不震迄光初四年任
詔之歲令河東聞意闕君諱闕字君闕為政以德五
教時序肅恭明神敬奉禮祀勤卹民隱而除其害愆
一縣之陵遲懼闕至之無備追惟伯禹遇治之利乃
復浚治敢詎通利其水紹修舊祀宏祐其祠使民報
祈視於社稷其有微拜州郡辟召皆當朱辭大小有
差敢防君尚饗後之人是遵是奉神必據焉光初四
年六月辛未造右般阮君神祠之碑銘篆額在鄭縣
靈帝光和四年縣令裴畢字君先立碑無縣令姓名
据水經得之般有二陵古稱地險蓋川阜高深而盛
水集有阮以儲之則可以疏泄溉注而無溢溢之志
自魏晉以來謂之五部神廟歐陽公嘗託御使者模
此碑命工以麵填其刻而鐫剔之始可讀云廟有石
隄西成樹谷五樓先生東臺御史王翦將軍之像莫
可曉今碑云石隄樹谷南通高雒當是有石為隄有
木為谷後人因以名其神碑云前世通利吏民興貴

有御史大夫將軍牧伯故為立詞考其文意蓋謂前世阮不埋塞水泉通利地產人物有至御史將軍牧伯之貴者後人不考亦以名其神爾光之和之四年龍集辛酉此碑以作詛為作詒者出西漢天文志碑以彭為彭防即阮字祐即拓字金石錄跋尾曰裴君水經以為名單而集古錄云名玦今詳其點畫頗近畢字疑集古錄誤又歐陽棊集古錄目及宋不知作者天下碑錄俱作裴玦字君光光字亦誤當以酈注先正字為

渭水又與東石橋水會故沈水也水南出馬嶺

山北流逕武平城東按地理志左馮翊有武成縣王

莽之桓城也石橋水又逕鄭城東水有故石梁述征記曰鄭城東西十四里各有石梁者也又北逕沈城

北漢志地理志左馮翊有沈陽縣王莽更之曰制昌也蓋藉水以取稱矣渭水又東敷水注之水南出石山之敷谷北逕告平城東者舊所傳言武王伐紂告太平於此故城得厥名非所詳也敷水又北逕集靈宮西地理志曰華陰縣有集靈宮武帝起故張昶華嶽碑稱漢武慕其靈築宮在其後而北流注于渭渭水又東餘水注之水南出餘糧山之陰北流入于渭俗謂之宣水也渭水又東合黃酸之水世名之為于

渠水水南出升山北流注于渭渭水又東逕平舒城
北城側枕渭濱半破淪水南面通衢昔秦始皇之將
亡也江神素車白馬道華山下返璧于華陰平舒道
曰為遺鎬池君使者致之乃二十八年渡江所沉璧
也即江神返璧處也渭水之陽即襄德縣界也城在
渭水之北沙苑之南即襄德縣故城也世謂之高陽
城非矣地理志曰禹貢北條荆山在南山下有荆渠
即夏后鑄九鼎處也王莽更縣曰德驩渭水又東逕

長城北長澗水注之水南出太華之山側長城東而北流注于渭水史記秦孝公元年楚魏與秦接界魏築長城自鄭濱洛者也

又東過華陰縣北

渭水東南洛水入焉闕駟以為漆沮之水焉曹瞞傳曰操與馬超隔渭水每渡渭輒為超騎所衝突地多沙不可築城婁子伯說今寒可起沙為城以水灌之一宿而成操乃多作縑囊以埋水夜汲作城立于是水之次也

渭水逕華陰縣故城北春秋之陰晉也秦惠文王五年改

曰寧秦漢高帝八年更名華陰王莽之華壇也縣有華山

山海經曰其高五千仞削成而四方遠而望之又若華

狀西南有小華山也韓子曰秦昭王令工施鈎梯上華山

以節栢之心為博箭長八尺棋長八寸而勒之曰昭王嘗

與天神博于是神仙傳曰中山術叔卿嘗乘雲車駕白

鹿見漢武帝帝將臣之叔卿不言而去武帝悔求得其

子度世令追其父度世登華山見父與數人博于石上勅

度世令還山層雲秀故能懷靈抱異耳山上有二泉
東西分流至若山雨滂湃洪津泛灑挂溜騰虛直瀉

山下有漢魏文帝二廟

一清按詳下文只是漢文帝廟耳魏字義文也太平寰宇

記華陰縣有南北二廟北廟有古碑九所其一為漢鎮遠將軍段熲更修之碑黃門侍郎張景書漢文帝與鍾繇各于碑陰刻二十字此碑垂名海內南廟是華北君祠今有北君靈臺上仙下仙四神童院此即所謂二廟也但以南廟為華北君祠而北廟又廟有不云是漢文帝祠不可臆解或是文有脫誤耳

石闕數碑一碑是建安中立漢鎮遠將軍段熲更修
祠堂碑文漢給事黃門侍郎張景造景自書之魏文

帝又刊其碑陰二十餘字二書有重名垂于海內又
刊侍中司隸校尉鍾繇宏農太守毋丘儉姓名廣六
行鬱然循平是太康八年宏農太守河東衛叔始為

華陰令河東裴仲恂役其逸力修立壇廟夾道樹柏

迄于三陰事見永興元年華百石所造碑一清按隸釋華山有

四碑一西嶽華山碑咸宗延熹八年一西嶽華山亭碑靈帝光和二年一宏農太守樊毅復華下民祖碑

光和二年一樊毅修華嶽碑光和二年俱云水經有今本無是四碑蓋缺失矣西嶽碑洪氏云在華陰縣

咸宗延熹四年袁逢守宏農郡以華嶽舊碑文磨滅遂業經傳載原本勒斯石以垂後會遷京兆乃勒部

水椽杜遷市石遺書佐郎郭香察書碑成于後之四
年蓋孫瑒典郡時也又曰東漢循王莽之禁人無二
名郭香察書者察涖他人之書耳小歐陽以為郭香
察所書非也隸辨云額題云西嶽華山廟碑六篆字
為二行碑式云丈二十二行行三十七字袁府君肅
恭明神及京兆尹勅杜遷市石皆平闕高祖太宗孝
武並列行高出一字有故如巷局碑云勅都水椽杜
遷市石遺書佐郎郭香察書蓋一人市其石一人察
其書律歷志有太史治歷郎中郭香豈其人與金石
錄跋尾曰孝武皇帝修封禪之禮巡省五嶽立宮其
下宮曰集靈宮殿曰存仙殿門曰望仙門歐陽公集
古錄云所謂集靈宮者他書不見惟見此碑耳余按
班固漢書地理志華陰有集靈宮武帝起而酈道元
注水經亦云敷水北迳集靈宮引地理志所載其語
皆同然則不獨見于此碑矣而所謂存仙殿望仙門
者諸書不載都氏穆金薤琳琅曰漢西嶽華山碑董

氏書跋云集靈宮漢志既書之桓譚嘗賦之張景序曰世宗經集靈之宮三輔黃圖書其制度藝文類聚亦書其名則又金石錄之所未及者華山亭碑樊毅所立隸釋所謂華嶽有樊毅之碑三者也碑云毅字仲德集古錄集古錄目金石錄隸釋俱不著碑所在蓋亦在華山之上也復租碑及修華嶽碑集古錄目云在華州隸釋云復租碑全載光和二年十二月壬午奏牘無他詞修嶽碑云有漢元第五侯之冑謝陽之孫按范書樊宏封壽張侯樊丹射陽侯樊尋元都侯樊忠更父侯樊茂平望侯樊氏侯者五國毅即丹之後也又金石錄目有西嶽石闕銘跋尾云永和元年五月癸丑朔六月戊午宏農太守常山元氏張勳為西嶽華山作石闕高二丈二尺永和漢順帝晉穆帝姚泓皆有此號穆帝時華陰不屬晉以此碑字畫驗之恐非姚泓時蓋漢刻也是碑景伯所渭水又東未見即鄴注云廟有石闕數碑者是也

沙渠水注之水出南山北流西北入長安城城自華
山北經于河華嶽銘曰秦晉爭其祠立城建其左者
也郭著述征記指證魏之立長城長城在後不得在
斯斯為非矣渠水又北注于渭渭水又東逕定城北
西征記曰城因原立逖征記曰定城去潼關三十里
夾道各一城渭水又東泥泉水注之水出南山靈谷
而泉流注于渭水也渭水又東合沙渠水水即符禺
之水也南出符禺之山北流入于渭

又東入于河

春秋之渭汭也左傳閔公二年虢公敗犬戎于渭隊

服虔曰隊渭汭也杜預曰水之隈曲曰汭王肅云汭

入也呂忱曰汭者水相入也水會即船司所在矣地

理志曰渭水東至船司空入河服虔曰縣名都官

金氏

曰二字疑有訛誤三輔黃圖有船庫官後改為縣王莽之船

利者也

補豐水

宋敏求長安志長安縣下引水經注曰豐水出豐溪西北流分為二水一水東北流又北交水自東入焉又北昆明池水注之又北逕靈臺西又北至石塢注于渭萬年縣下云福水即交水也水經注曰上承樊川御宿諸水出縣南山石壁谷南三十里與真谷水合亦名子午谷水長安縣下引水經注曰交水又西南流與豐水支津合其北又有漢故渠出焉又西至石塢分為二水一水西流注豐水一水自石塢北逕

細柳諸原北流入昆明池又石闔堰下引水經注云
交水西至石碣漢武帝元狩三年穿昆明池所造一
清按漢書地理志右扶風鄠縣豐水出東南北過上
林苑入渭宋氏所引水經注今本失之而豐水源流
較班志尤詳也禹貢錐指曰先儒皆云豐涇大川故
曰會漆沮小水故曰過嘗考渭南本周之舊都西漢
因之其後隋唐復建都于此歷代相承鑿引諸川以
資汲取便轉輸溉民田灌苑囿津渠交絡離合不常

凡地志水經所言類非禹迹之舊詩曰豐水東注維
禹之績則渭南諸川唯豐為大自漢鴻嘉中王商穿
長安城引內豐水注第中而其流漸微逮唐貞觀中
堰豐鎬入昆明池二水于是斷流又于京城西北引
豐水為漕渠合鎬水北流由禁苑入渭而豐水之流
愈微矣竊疑豐西之澇豐東之鎬潘霸漑禹時悉合
豐以入渭故豐得成其大且詩言東注而漢志言北
過上林苑入渭則是北流而非東注矣按豐水入昆

明池不始於唐東樵云云由未見水經注逸文故也

補涇水

禹貢錐指曰周禮雍州其川涇汭水經無涇水之目
渭水篇中於入渭處僅附見一語而寰宇記原州平
高縣笄頭山一名崆峒山下引水經注云蓋大隴山
之異名莊子謂黃帝學道于廣成子蓋在此山百泉
縣涇水下引水經云涇水出安定涇陽縣高山注云
山海經曰高山涇水出焉東流注于渭入闕謂之入

水彈箏峽下引水經注云涇水逕都盧山山路之內
常有如彈箏之聲行者聞之鼓舞而去又云弦歌之
山峽口水流風吹滴崖響如彈箏之韻因名涇州靈
臺縣蒲川水下引水經注云蒲川水出南山蒲谷東
北合細川水又東北合且氏川水邠州宜祿縣芹川
下引水經注云出羅川縣千子山山一名千子嶺東
流逕宜祿縣北寧州真寧縣大陵水下引水經注云
大陵小陵水出巡河南殊川西南逕寧陽城故幽詩

云夾其皇澗陵水即皇澗乾州永壽縣高泉下引水
經注云甘泉山即高泉山也耀州雲陽縣涇水下引
水經注云涇水東流歷峽謂之涇峽五龍谷泉下引
水經注云五龍水出雲陽宮西南雍州醴泉縣谷口
城下引水經注云九峻山東仲山西謂之谷口本文
是九峻山東連仲山西當涇水處故謂之谷口即寒
門也此皆言涇水而今本無之是水經元有涇水篇
宋初尚存後乃亡之耳一清按寰宇記渭州潘源縣

下引水經云良源縣有銅城山水出歷白石城隴州
吳山縣下引水經注云南由縣有白環水出白環谷
二條皆涇水注文而東樵失引之又漢書地理志安
定郡烏氏縣都盧山在西師古曰氏音支九域志曰
都盧峽即彈箏峽又文選北征賦登赤須之長坂入
義渠之舊城李善注云赤須阪在北地郡水經注赤
須水出赤須谷西南流注羅水寰宇記云真寧縣羅
川水出羅山寧州古公劉邑春秋為義渠戎國有義

渠城漢書地理志北地郡義渠道也又初學記引水
經注曰梁谷水西南注于涇又曰涇水經望夷宮北
臨涇水以望北夷秦二世將祠涇沈四白馬於涇齋
於此宮內又曰涇水經長平觀北甘露三年呼韓邪
單于入朝上登長平觀詔單于無謁即是觀也又長
安志醴泉縣下引水經注曰涇水導源安定朝那縣
西筭頭山秦始皇巡地西出筭頭山即是山也蓋大
隴之異名又名勝志邠州淳化縣下引水經注云五

龍水泉流逕長箱坂下方輿紀要云車箱坂水經謂
之長箱坂諸所引文又在寰宇記之外錐指又曰元
和志云漆水在新平縣西九里北流注于涇寰宇記
云注水經曰漆水自宜祿縣來又東過漆縣北今縣
西九里有白土川東北流逕白土原東陳陽原西又
東北流注涇水此條亦是涇水篇逸文故不見於漆
水注中也又漢志鹵縣濯水出西北則未知所在矣

補
汭水

太平寰宇記隴州汧源縣下引水經注云芮水出小隴山其川名汧邠州宜祿縣芮水下引水經注云汧水又東逕宜祿川俗謂之宜祿川水通典引水經云汧水經宜祿川俗曰宜祿水方輿紀要云芮水出鳳翔府隴州西四十里弦蒲藪東北流入平涼府華亭縣南又東逕崇信縣北至涇州城北又東南過長武縣北而東流合于涇水禹貢錐指曰涇屬渭汧傳曰水北曰汧春秋傳註曰水之隈曲曰汧說文汧水相

入也按二義適相成而不相悖蓋兩水相入其水會襟帶處必有隈曲詩大雅芮鞠之即芮即職方涇汭之汭水名也漢志扶風汭縣下云芮水出西北東入涇詩芮隄雍州川也師古曰隄讀與鞠同余因悟水北曰汭之義蓋涇水東南流至邠州長武縣東芮水自平涼府靈臺縣界流經縣南而東注于涇公劉所居故豳城正在二水相會內曲之處及其後人衆而地不能容則又營其外曲以居故曰止旅迺密芮鞠

之即鄭箋曰水之內曰隩水之外曰鞠外即南內即
北也一清按涇汭各源汭流稍短不若涇耳職方以
二水為雍州川水經宜列于篇目故採擷羣書以補

逸文



水經注釋卷十九

欽定四庫全書

史部

水經注釋卷二十一

二十一

詳校官監察御史_臣周元良

刑部郎中_臣許兆椿覆勘

總校官降調編修_臣倉聖脉

校對官編修_臣汪學金

謄錄監生_臣畢繼曾

欽定四庫全書

水經注釋卷二十

仁和趙一清撰

漾水 丹水

漾水出隴西氐道縣嶓冢山東至武都沮縣為漢水

常據華陽國記曰漢水有二源東源出武都氐道縣
嶓山為漾水禹貢導漾東流為漢是也西源出隴西
嶓冢山會白水逕葭萌入漢始源曰沔按沔水

出東狼谷逕沮縣入漢漢中記曰蟠冢以東水皆東流蟠冢以西水皆西流即其地勢源流所歸故俗以蟠冢為分水嶺即此推沔水無西入之理劉澄之云

有水從河陽縣

一清按漢書高帝紀師古曰阿陽天水之縣也今流俗書本或作河陽者

非也章懷後漢書注亦云然則寫阿陽為河陽其來舊矣

南至梓潼漢壽入大穴

暗通罌山郭景純亦言是矣罌山穴小本不容水水成大澤而流與漢合庾仲邕又言漢水自武遂川南入蔓葛谷越野牛逕至開城合西漢水故諸言漢者

多言西漢水至葭萌入漢又曰始源曰沔是以經云
漾水出氐道縣東至沮縣為漢水東南至廣魏白水
診其泐注似與三說相符而未極西漢之源矣然東
西兩川俱受沔漢之名者義或在茲矣班固地理志
司馬彪袁山松郡國志並言漢有二源東出氐道西
出西縣之岿冢山闕駟云漢或為漾漾水出崑崙西
北隅至氐道重源顯發而為漾水又言隴西西縣岿
冢山在西漢水所出南入廣魏白水又云漾水出源

道東至武都入漢許慎呂忱並言漾水出隴西獮道東至武都為漢水不言氏道然獮道在冀之西北又隔諸川無水南入疑出獮道之為謬矣又云漢漾也東為滄浪水山海經曰嶠冢之山漢水出焉而東南流注于沔然東西兩川俱出嶠冢而同為漢水者也孔安國曰泉始出為漾其猶濛耳而常璩專為漾山漾水當是作者附而為山水之殊目矣余按山海經漾水出崑崙西北隅而南流注于醜塗之水穆天子

傳曰天子自春山西征至于赤烏氏己卯北征庚辰
濟于洋水辛巳入于曹奴曹奴之人戲觴天子于洋
水之上乃獻良馬九百牛羊七千天子使逢固受之
天子乃賜之黃金之鹿戲乃膜拜而受余以太和中
從高祖北巡狄人猶有此獻雖古今世殊而所貢不
異然川流隱伏卒難詳照地理潛闕變通無方復不
可全言闕氏之非也

何氏曰山海經洋音詳不可雖
竟指為漾以証闕駒之說

津流派別枝渠勢懸原始要終潛流或一故俱受漢

漾之名納方土之稱是其有漢川漢陽廣漢漢壽之
號或因其始或據其終縱異名互見猶為漢漾矣川
共目殊或亦在斯今西縣嶓冢山西漢水所導也然
微涓細注若通羃歷津注而已西流與馬池水合水
出上邽西南六十餘里謂之龍淵水言神馬出山
同涂吾來淵之異故因名焉開山圖曰隴西神馬山
有淵池龍馬所生即是水也其水西流謂之馬池川
又西流入西漢水西漢水又西南流左得蘭渠溪水

次西有山黎谷水次西有鐵谷水次西有石耽谷水
次西有南谷水並出南山揚湍北注右得高望谷水
次西得西溪水次西得黃花谷水咸出北山飛波南
入西漢水又西南資水注之水北出資川導源四壑
南至資峽總為一水出峽西南流注西漢水西漢水
又西南得峽石口水出苑亭西草黑谷三溪西南
至峽石口合為一瀆東南流屈而南注西漢水西漢
水又西南合楊廉川水水出西谷衆川瀉流合成一

川東南流逕西縣故城北秦莊公伐西戎破之周宣
王與其大駱夫丘之地為西垂大夫亦西垂宮也王
莽之西治矣建武八年世祖至河陽竇融等悉會天
水震動隗囂將妻子奔西城從楊廣廣死囂愁窮城
守時潁川賊起車駕東歸留吳漢岑彭圍囂岑等壅
西谷水以縑幔盛土為堤灌城城未沒丈餘水穿壅
不行地中數丈涌出故城不壞王元請蜀救至漢等
退還上邽但廣廉字相狀後人因以人名之故習

訥為楊廉也置楊廉縣焉又東南流右會茅川水水
出西南戎溪東北流逕戎丘城南吳漢之圍西城王
捷登城向漢軍曰為隗王城守者皆必死無二心願
諸將亟罷請自殺以明之遂刎剄而死又東北流注
西谷水亂流東南入于西漢水西漢水又西南逕始
昌峽直始昌縣故城西晉書地道記曰天水始昌縣
故西城也亦曰清崖峽西漢水又西南逕宕備戍南
左則宕備水自東南西北注之右則鹽官水南入焉

水北有鹽官在嶓冢西五十許里相承營煮不輟味
與海鹽同故地理志云西縣有鹽官是也其水東南
逕宕備戍西東南入漢水漢水又西南合左谷水水
出南山窮溪北注漢水又西南蘭皋水出于西北五
交谷東南歷祁山軍東南入漢水漢水又東南逕祁
山軍南雞水南出雞谷北逕水南縣西北流注於漢
漢水又西建安川水入焉其水導源建威西北山白
石戍東南二源合注東逕建威城南又東與蘭坑水

會水出西南近溪東北逕蘭坑城西東北流注建安
水建安水又東逕蘭坑城北建安城南其地故西縣
之歷城也楊定自隴右徙治歷城卽此處也去仇池
一百二十里後改為建安城其水又東合錯水水出
錯水戍東南而東北入建安水建安水又東北有雉
尾谷水又東北有太谷水又北有小祁山水並出東
溪揚波西注又北左會胡谷水水西出胡谷東逕金
盤歷城二軍北軍在水南層山上其水又東注建安

水建安水又東北逕塞峽元嘉十九年宋太祖遣龍
驤將軍裴方明伐楊難當難當將妻子北奔安西叅
軍魯尚期追出塞峽即是峽矣左山側有石穴洞人
言潛通下辨所未詳也其水出峽西北流注漢水漢
水北連山秀舉羅峰兢峙祁山在嶠冢之西七十許
里山上有城極為巖固昔諸葛亮攻祁山即斯城也
漢水逕其南城南三里有亮故壘壘之左右猶豐茂
宿草蓋亮所植也在上邦西南二百四十里開山圖

曰漢陽西南有祁山礪徑逶迤山高巖嶮九州之名
岨天下之竒峻今此山于衆阜之中亦非為傑矣漢
水又西南與甲谷水合水出西南甲谷東北流注漢
水漢水又西逕南岨北岨之中上下有二城相對左
右墳隴低昂互山被阜古語云南岨北岨萬有餘家
諸葛亮表言祁山去沮縣五百里有民萬戶矚其丘
墟信為殷矣漢水西南逕武植戍南武植戍水發北
山二源竒發合于安民戍南又南逕武植戍西而西

南流注于漢水漢水又西南逕平夷戍南又西南夷
水注之水出北山南逕其戍西南入漢水漢水又西
逕蘭倉城南又南右會兩溪俱出西山東流注于漢
水張華博物志云溫水出烏鼠山下注漢水疑是此
水而非所詳也漢水又南入嘉陵道而為嘉陵水世
俗名之為階陵水非也漢水又東南得北谷水又東
南得武階水又東南得倉谷水右三水並出西溪東
流注漢水漢水又東南逕瞿堆西又屈逕瞿堆南絕

壁峭峙孤嶮雲高望之形若覆壺其高二十餘里羊腸蟠道三十六迴開山圖謂之仇夷所謂積石嵯峨嶽岑隱阿者也有平田百頃煮土成鹽因以百頃為號山上豐水泉所謂清泉湧沸潤水上流者也漢武帝元鼎六年開以為武都郡郡天池大澤在西故以都為目矣王莽更名樂平郡縣曰循虜常璩范奕云郡居河池一名仇池池方百頃即指此也左右悉白馬氏矣漢獻帝建安中有天水氏楊騰者世居隴右

為氏太師子駒勇健多計徙居仇池魏拜為百頃氏
王漢水又東合洛谷水水有二源同注一壑於神蛇
戍西左右山溪多五色蛇性馴良不為物毒洛谷水
又南逕虎虺戍東又南逕仇池郡西瞿堆東西南入
漢水漢水又東合洛漢水水北發洛谷南逕威武戍
南又西南與龍門水合水出西北龍門谷東流與橫
水會東北窮溪即水源也又南逕龍門戍東又東南
入洛漢水又東南逕上祿縣故城西修源濬導逕引

北溪南總兩川單流納漢漢水又東南逕濁水城南

又東南會平洛水水出武階東北四十五里更馳南

溪導源東北流山側有甘泉涌波飛清下注平洛水

又逕甘泉戍南又東逕平洛戍南

一清按漢志武都郡有平樂道即平

洛戍也道元時其縣已廢省矣

又東入漢謂之會口漢水東南逕脩

城道南與脩水合水總二源東北合漢漢水又東南

於槃頭郡南與濁水合水出濁城北東流與丁令溪

水會其水北出丁令谷南逕武街城西東南入濁水

濁水又東逕武街城南故下辨縣治也李倉李推以
氏王楊敵堅妻死葬陰平襲武街為氏所殺於此矣

一清按華陽國志十六國春秋李倉作李瑤又氏王
楊難敵堅頭乃兄弟二人此云楊敵堅蓋誤文也

今廣業郡治濁水又東宏休水注之水北出溪南逕
武街城東而南流注於濁水濁水又東逕白石縣南續漢

書曰虞詡為武都太守下辨東三十餘里有峽峽中

白水生大石障塞水流春夏輒潰溢敗壞城郭詡使
燒石以醋灌之石皆淬裂因鑄去焉遂無泛溢之害

濁水即白水之異名也濁水又東南渥陽水北出渥
谷南逕白石縣東而南入濁水濁水又東南與仇鳩
水合水發鳩溪南逕河池縣故城西王莽之樂平亭
也其水西南流注濁水濁水又東南與河池水合水
出河池北口南逕河池戍東西南入濁水濁水東南
兩當水注之水出陳倉縣之大散嶺西南流入故道
川謂之故道水西南逕故道城東魏征仇池築以置
戍與馬鞍山水合水東出馬鞍山歷谷西流至故道

城東西入故道水西南流北川水注之水出北洛櫛
山南南流逕唐倉城下南至困冢川入故道水故道
水又西南歷廣香交合廣香川水出南由縣利喬

山

一清按郡國志劉昭補注引秦州記曰上邽縣北有利山川中平地有土堆高五丈生細竹翠茂如

常二楊樹大數十圍百姓祀之朱氏謀埽窆曰利一作穆未知所據

南流至廣香川謂

之廣香川水

一清按蕭齊建元元年葭萌戍主楊廣香請降以為沙州刺史川蓋以人得名

又南注故道水謂之廣香交故道水又西南入秦岡

山尚婆水注之山高入雲遠望增狀若嶺紆曠軒峯

枉月駕矣懸崖之側列壁之上有神象若圖指狀婦人之容其形上赤下白世名之曰聖女神至於福應愆違方俗是祈水源北出利喬山南逕尚婆川謂之

尚婆水

一清按元和郡縣志云尚婆水本名石磐水水多磐石因以為名俗語音訛故云尚婆

歷兩當縣之尚婆城南魏故道郡治也西南至秦岡山入故道水故道水又右合黃盧山水水出西北天水郡黃盧山腹歷谷南流交注故道水故道水南入東益州之廣業郡界與沮水枝津合謂之兩當溪水

上承武都沮縣之沮水瀆西南流注於兩當溪虞詡
為郡漕穀布在沮從沮縣至下辨山道峻絕水中多
石舟車不通驢馬負運儗五致一詡乃於沮受儗直
約自致之即將吏民按行皆燒石樵木開漕船道水
運通利歲省萬計以其儗廩與吏士年四十餘萬也
又西南注于濁水濁水南逕槃頭郡東而南合鳳溪
水水上承濁水於廣業郡南逕鳳溪中有二石雙高
其形若闕漢世有鳳凰止焉故謂之鳳凰臺北去郡

三里水出臺下東南流左注濁水濁水又南注漢水
漢水又東南歷漢曲逕挾崖與挾崖水合水西出擔
潭交東流入漢水漢水又東逕武興城南又東南與
北谷水合水出武興東北而西南逕武興城北謂之
北谷水南轉逕其城東而南與一水合水出東溪西
流注北谷水又南流注漢水漢水又西南逕關城北
除水出西北除溪東南流入于漢漢水又西南逕通
谷通谷水出東北通溪上承漾水西南流為西漢水

漢水又西南寒水注之水東出寒川西流入漢漢水
又西逕石亭戍廣平水西出百頃川東南流注漢又
有平阿水出東山西流注漢水漢水又逕晉壽城西
而南合漢壽水水源出東山西逕東晉壽故城南而
西南入于漢水也

又東南至廣魏

一清按此篇及羌水涪水梓潼水經文俱作廣魏胡氏曰廣魏者故廣漢也蓋

曹氏改名漢後人續經此其一證何氏曰亭林云魏書崔浩傳浩工書人多託寫急就章必稱馮代疆以示不敢犯國史于馮代疆下注曰疑按急就篇有馮漢疆魏初國號曰代故改漢疆為代疆酈道元以廣漢為廣魏

即此例也據此則非由曹氏改名是又一義也白水縣西又東南至葭萌縣東

北與羌水合

白水西北出於臨洮縣西南西傾山

一清按漢志廣漢郡甸氏道白

水出徼外東至葭萌入漢過郡一行九百五十里

水色白濁東南流與黑水

合水出羌中西南逕黑水城西又西南入白水白水

又東逕洛和城南洛和水西南出和溪東北流逕南

黑水城西而北注白水白水又東南逕鄧至城南又

東南與大夷祝水合水出夷祝城西南而窮溪北注

夷水又東北合羊洪水出東南羊溪西北逕夷祝城
東又西北流屈而東北注于夷水夷水又東北入白
水白水又東與安昌水會水源發衛大西溪東南逕
鄧至安昌郡南又東南合無累水無累水出東北近
溪西南入安昌水安昌水又東南入白水白水又東
南入陰平得東維水水出西北維谷東南逕維城西
東南入白水白水又東南逕陰平道故城南王莽更
名推虜矣即廣漢之北部也廣漢屬國都尉治漢安

帝永初三年分廣漢蠻夷置有白馬水出長松縣西

南白馬溪東北逕長松縣北

一清按隋書地理志武都郡長松縣西魏置初

曰建昌開皇十八年改曰長松此昔人所謂未必不間及隋唐者也吁可怪已

而東北注白

水白水又東逕陰平大城北蓋其渠帥自故城徙居

也白水又東偃溪水出西南偃溪東北流逕偃城西

而東北流入白水白水又東逕偃城北又東北逕橋

頭昔姜維之將還蜀也雒州刺史諸葛緒邀之於此

後期不及故維得保劍閣而鍾會不能入也白水又

與羌水合自下羌水又得其通稱矣白水又東逕郭
公城南昔郭淮之攻廖化於陰平也築之故因名焉
白水又東雖川水出西南雖溪東北注白水白水又
東合空冷水傍溪西南窮谷即川源也白水又東南
與五部水會水有二源西源出五部溪東南流東源
出郎谷西南合注白水白水又東南逕建陽郡東

一清

按兩漢晉宋後魏地志俱無建陽郡之名名勝志引此文作建昌郡則西魏析陰平所置也以地望而言宇文曾置建昌縣後改曰長松建昌疑即上長松之舊稱然皆在孝昌以後道元何由得舉之乎或曰此

後魏梁州之華陽郡也建
陽疑華陽之訛未詳是非而北與一水合二源同注

共成一溪西南流入於白水白水又東南逕白水縣
故城東即白水郡治也經云漢水出其西非也白水
又東南與西谷水相得水出西溪東流逕白水城南
東南入白水白水又南左會東流水東入極溪即水
源也白水又南逕武興城東又東南左得刺嵇水口
溪東北出便水源矣白水又東南清水左注之庾仲
雖曰清水自祁山東合白水斯為孟浪也水出於平

武郡東北

一清按隋書地理志云平武郡西魏置

曠累互下南逕平武

城東屈逕其城南又西歷平洛郡東南屈而東逕南

陽僑郡東北又東南逕新巴縣東北又東南逕始平

僑郡南又東南逕小劍戍北西去大劍三十里連山

絕嶮飛閣通衢故謂之劍閣也張載銘曰一人守嶮

萬夫趨起信然故李特至劍閣而嘆曰劉氏有如此

地而面縛於人豈不奴才也小劍水西南出劍谷東

北流逕其戍下入清水清水又東南注白水白水又

東南逕吐費城南即西晉壽之東北也東北流注漢

水西晉壽即蜀王弟葭萌所封為苴侯故遂名城為

葭萌矣劉備改曰漢壽太康中又曰晉壽水有津關

一清按通鑑注引水經注云白水東南流至葭萌縣謂之葭萌水水有津關所謂白水關今本似有脫文

段元章善風角弟子歸元章封筒藥授之曰路有急

難開之生到葭萌從者與津吏爭打傷開筒得書言

其破頭者可以此藥裹之生乃歎服還卒業焉亦廉

叔度抱父柩自沉處也

又東南過巴郡閬中縣

巴西郡治也劉璋之分三巴此其一焉閬駟曰強水出陰平西北強山一曰強川姜維之還也鄧艾遣天水太守王頌敗之於強川即是水也其水東北逕武都陰平梓潼南安入漢水漢水又東南逕津渠戍東又南逕閬中縣東閬水出閬陽縣而東逕其縣南又東注漢水昔劉璋之攻霍峻于葭萌也自此水上張達范疆害張飛於此縣漢水又東南得東口水出

巴嶺南歷獠中謂之東遊水李壽之時獠自牂牁北
入所在諸部布滿山谷其水西南逕宋熙郡東又東
南逕始平城東又東南逕巴西郡東又東入漢水漢
水又東與濩溪水合水出獠中世亦謂之為清水也
東南流注漢水漢水又東南逕宕渠縣東又東南合
宕渠水西北出南鄭縣巴嶺與槃余水同源派注南
流謂之北水東南流與難江水合水出東北巴山清

按寰宇記集州難江縣引此注
作小巴山云小巴嶺在縣東

西南注之又東南流

逕宕渠縣謂之宕渠水又東南入于漢

又東南入漢州江津縣東南入于江

一清按此條經文誤也尚書古文疏

証曰胡肅明曰水經魏晉人續成自後周有附益亦未必不及隋唐頃譜至漾水末有漢州江津縣大驚曰此

非隋唐人筆乎漢乃渝字之譌渝州江津縣今屬重慶府本州治巴縣地西魏分置江陽縣隋改曰江津巴縣

在東江津在西漢水不得過江津也再三推尋不知其故及譜至羌水篇云出羌中東南至廣魏白水縣與漢

水合又東南至巴郡閬中縣又南至墊江東南入于江

水入江之道即羌水入江之道自閬中以下經文與此

字字相同今本之誤蓋由東南入于江之上字有空缺

妄庸人率意填補耳非續經也墊江今合州漢水流逕

州東涪水自州西南來注之正郝氏所云涪水注之庾

仲雍所謂涪內水者也若作渝州江津縣則涪漢之合
遠在上流經注齟齬矣東南入漢州江津七字當改作
南至墊江四字入字尤非水經叙次水所逕過之即之
縣未有用入字者潛丘以經文有空缺為妄庸人所填
寫非魏晉以後續經真卓識也東樵既而與論証及作
錐指據漢書地理志隴西西縣下云禹貢嶠家山西漢
水所出南入廣魏白水東南入于江而不從閭說江州江津
又東南逕江州縣東南入于江而從閭說江州江津
俱屬巴郡第江州漢縣而江津則隋置耳且漢州唐垂
拱二年始立此名明是不學者妄為填寫潛丘乃改作
渝州以實其為隋唐人之筆何至曲為之說如此耶江
水篇云又東北至巴郡江州縣東強水涪水漢水白水
宕渠水五水合南流注之足相証
明東樵以班志為據較疏證似長

涪水注之庾仲雍所謂涪內水者也

一清按漢水班
志既有東西各

源之分水經又有漾沔異篇之目後之言禹貢者山川迤無定位莫能折衷黃文叔尚書說曰漢有沔漾之名皆東漢水也地理志西漢水出西縣嶓冢山南入廣漢白水蓋潛漢也經不著其所出自古皆以為東西兩漢俱出嶓冢則或然矣而西漢固無沔漾之名漢志漾水出隴西氏道至武都為漢武都東漢水受氏道水一名沔是則沔漾俱為東漢也獨氏道武都脈絡不通川渠阻隔武都受漾為不可據而桑欽遊徒氏道漾水為西漢之源由是愈紛錯鄴道元委曲遷就通之以潛伏之流証之以難驗之論更覺齟齬故雷盡廢諸說而一之以經文杜佑通典秦州上邦縣嶓冢山西漢水所出經嘉陵曰嘉陵江經閬中曰閬中江漢中金牛縣嶓冢山禹貢漾水至此為漢水亦曰沔水其說為可據常璩華陽國記漾水出漾山漾山尋求不得其處漢志沮縣沮水出東狼谷中水經推為沔水之源是否姑存之要與孔傳不同矣

胡身之通鑑注云據禹貢則漢水源于漾據水經則漾會于涪河入于江所出異源所入異派據班志則漾出氏道至武都為漢水而東漢受氏道水通謂之河過江夏而入于江則漾河似合為一矣然又言沮水出沮縣南至沙羨入江與水經所謂沔水即沮水說似不合而實合也夫道元之曲護經文誠如黃說然其言嶠冢有二東西兩漢異源同流是豈竟無別白耶若程泰之禹貢論力排水經反覆于東出西南其向曉曉不置近世胡朏明作禹貢錐指首列導漾圖又作東西二源圖可謂詳且備矣然不能於班志原文一加審諦即道元之注亦未之深察故立言之旨猶有所蔽今畧舉其書曰按後魏地形志華陽郡嶠冢縣有嶠冢山漢水出焉唐六典山南道名山曰嶠冢嶠冢縣故城在今陝西漢中府沔縣西南四十里西南接寧羌州界今在州北九十里山海經漢水出緄嶠山蓋嶠冢之異名也本在漢中郡沔陽縣界

後魏正始中析沔陽置嶠冢縣屬華陽郡故地形志云其縣有嶠冢山隋省沔陽入嶠冢屬梁州大業初改置西縣故隋志云西縣有嶠冢山唐武德二年分利州綿谷縣之通谷鎮置金牛縣而山入其境故括地志云嶠冢山在金牛縣東二十八里通典云金牛縣有嶠冢山四年又分綿谷置三泉縣寶曆初省金牛入三泉故寰宇記云嶠冢山在三泉縣東宋至道二年升三泉縣為大安軍紹興三年改建軍于西縣界復置三泉縣隸軍故輿地紀勝引宋朝郡縣志云今之言漢水以西縣之嶠冢山為源後又省三泉入軍故地理通釋云嶠冢山在大安軍西元降軍為縣故大一統志云漢水源出大安縣嶠冢山明初以其地改置沔縣又於縣西南置寧羌衛成化二十二年即衛置州而山入其境故漢中府志云嶠冢山在寧羌州北九十里蓋此山本在漢沔陽縣界西南接葭萌自後魏以來言山之所在曰嶠冢曰西縣曰金牛

曰三泉曰大安曰寧羗地名六變而山則一皆在古
梁州之域其為禹貢之嶠冢無疑也又云嶠冢山孔
傳不言所在之郡縣而正義引地理志以實之曰隴
西郡西縣嶠冢山西漢水所出夫此水即嘉陵水之
上源非禹貢之所謂嶠冢導漾東流為漢者也而班
固以西縣之嶠冢為禹貢之嶠冢謬矣自是以後言
嶠冢者率依班氏自後魏正始中析沔陽地置嶠冢
縣以表其山而名始著酈道元卒於葦昌二年上距
正始置縣之時凡二十餘歲本朝典故生所親見而
注水經不言豈事在成書之後不及追改抑亦因其
晚出而疑之乎然漾水注引漢中記曰嶠冢以東水
皆東流嶠冢以西水皆西流故俗以嶠冢為分水嶺
作者亦似知班志之繆而以禹貢嶠冢為當在漢中
也者不然于漢中記奚為詳及隴西之山邪穎達豈
未之考乎然班志雖以西縣嶠冢為禹貢之山而養
水自繫氏道之下不言出某山自水經云漾水出氏

道縣岫冢山而氏道亦有岫冢矣常璩華陽國志云東源出武都氏道縣漾山為漾水而氏道之岫冢且有漾山之目矣郭璞注山海經云岫冢今在武都氏道縣南鄴道元注水經云東西兩源俱出岫冢而同一為漢水則似一山跨二縣之境而在西縣者為西源在氏道者為東源矣輟轉迷惑愈久愈謫而禹貢之岫冢幾不可問矣西縣故城在今秦州西南氏道不知所在蓋自晉永嘉之亂隴西沒于氏羌郡縣荒廢常璩郭璞皆云氏道屬武都而晉志武都郡無之則其縣之不可考久矣要之二縣在隴西皆古雍州域也而禹貢岫冢乃梁州之山不應闌入雍域故惟魏收所言為得其實又云漢志隴西西縣下云禹貢岫冢山西漢水所出南入廣漢白水東南至江州入江過郡四行二千七百六十里此與氏道之養水全無交涉水經非一時一手作漾水篇首云漾水出隴西氏道縣岫冢山東至武都沮縣為漢水此不過依漢

志氏道一條以立文惟加嶠冢沮縣為不同耳其所謂漢水即東漢也亦與西縣之西漢全無交涉首尾橫決必魏晉間人所續也尋其意旨蓋以氏道水南合濁水兩當溪歷槃頭即東而南為西漢水也故鄴注以為東西兩川俱出嶠冢而同為漢水嘗試以圖志考之漾沮雖有枝津與西漢通要皆自東入西非自西入東也蓋嶠冢互絕東西俗謂之分水嶠地勢東高而西下故西漢水自畧陽縣南入寧羌州界即折而西南避高就下其性則然豈有東入之理澄之所言即禹貢之潛仲邕所言即通谷水也二水皆東漢之枝津西流入西漢水而說者乃謂西漢水至葭萌入漢顛倒之矣今嶺東漾沮枝津皆入西漢嶺西谿澗之水亦皆入西漢川流去來有目者盡能驗之其可是古而非今乎又曰水經依漢志以為言漢志以沮水枝津上承氏道水下為東漢水氏道雖未詳其處所以地望度之當在西縣之東河池之西上邽

<p>撰蜀道驛程記其言嶠漢最為詳覈記曰出沔縣西門曲折行亂山中沔水流逕其中略如棧道但山庠</p>	<p>安國傳所謂泉始出山為漾水也新城王尚書士禎</p>	<p>漢水之源務觀入蜀塗歷金牛目驗得之涓涓細流</p>	<p>也又云陸游曰嘗登嶠冢山有泉涓涓出山間是為</p>	<p>山而為之殊目要之氏道水所出別是一山非嶠冢</p>	<p>嶠冢山矣常瘵知其非是故又因水以名其山曰漾</p>	<p>養水出何山而水經復附會之曰嶠冢則氏道亦有</p>	<p>亦以氏道水下通沮水為東漢之源也然漢志不言</p>	<p>班固因之故有此誤水經于成都下加沮縣二字蓋</p>	<p>溪由枝津以達沮沔是為東漢之源而不知其非也</p>	<p>下不辨川流之去來遂以為氏道養水合濁水雨當</p>	<p>西非自西入東也皆之觀水作記者不察地勢之高</p>	<p>水者但今無可考耳然沮水枝津上承沮瀆自東入</p>	<p>之南下辨之北濁水所受有丁令溪水宏休水涯陽</p>	<p>水皆出其北蓋自氏道來也其中或有漢志所謂養</p>
---	-----------------------------	-----------------------------	-----------------------------	-----------------------------	-----------------------------	-----------------------------	-----------------------------	-----------------------------	-----------------------------	-----------------------------	-----------------------------	-----------------------------	-----------------------------	-----------------------------

無林木河流舒緩不及襄水湍悍耳西涉沮水抵大安驛狹者才二三尺沙石磷磷深不沒蹀自大安西南亂山益稠至金牛驛北望見嶠冢山峩然雲表一小水自西東流即所謂嶠冢導漾者也水纔濫觴不沒鳥雁合五丁峽水東流為沔其流始大金牛驛西三里稍南入五丁峽一名金牛峽峽口懸崖萬仞陰風颯然水自峽中噴薄而出寧羗州在亂山中無城堞木沔縣羊麇坪地明洪武中以山寇作亂置寧羗衛于此成化中即衛建州治自州行十里渡水過百牢關關下有分水嶺嶺東水皆北流五丁峽水北合漾水入沔嶺西水皆南流逕七盤關龍洞合嘉陵水為川江常璩言沔出嶠冢合白水為西漢明與導漾之文相悖按通典嶠冢山有二一在天水上邽一在漢中金牛雍大記云西漢水在西和縣源出嶠冢山西流與馬池水合此乃上邽之嶠冢在今秦州漢江源出沔縣嶠冢山東流入金州此乃金牛之嶠冢焉

貢嶠冢導漾乃沔縣之嶠冢非秦州之嶠冢知嶠冢有二則東西二漢源流各自了然漾之與沔本為一流與隴西之嶠冢都無交涉帝氏之誤可不辨而自明矣又云禹貢以嶠冢繫梁州而漢志嶠冢在雍域之隴西一誤也禹貢云嶠冢導漾而漢志以嶠冢所出為西漢水其漾水則出氏道二誤也禹貢之潛乃漾水枝津西出為西漢水而漢志西漢水出西縣之嶠冢三誤也漢志不言漾水出何山而水經云出氏道縣嶠冢山是氏道亦有嶠冢四誤也漾者東漢之源而續水經者以西漢水接漾水為一川五誤也漾沔入漢津皆自東入西而酈注從舊說云西漢水至葭萌入漢六誤也川流地上離合灼然可見而酈注惑闕咽之說以為原始要終潛流或一故東西俱受漢漾之名七誤也羣言散亂學者靡所折衷今說漢水當排棄諸家專主禹貢以沮沔為漢之別源以西漢為漾之枝津而氏道水則存而不論是亦理亂絲解

連環之術也東樵之言剖判辨析幾無賸義而邵意則猶有未安者水經以漾水冒于西漢之上而東漢之源僅以沮沔枝津當之足其大錯而以為誤始班志竊謂不然班志隴西西縣下云禹貢嶓冢山西漢水所出猶恐人誤以西漢水即禹貢之漢水于氏道下云禹貢養水所出至武都為漢武都下云東漢水受氏道水一名沔過江夏謂之夏水入江漢中沔陽下云沔水出武都東南入江氏道水即養水今人既不知氏道之所在又烏能必養水之不出于氏道乎夫河源眇茫隔在異域尚可追尋况氏道雖陷氏羌當漢盛時猶隸版籍班氏之記載非盡無稽也由氏道而沔而漢以入于江源流脈絡條貫分明又武都沮縣下云沮水出東嶓冢南至沙羨入江夫沮即沔也嶓冢即嶓冢也隴西之嶓冢西漢之所出氏道之養水乃大禹之所導班志明言之而猶歸過于班氏班氏不受也道元知水經漾水之誤于是欲于禹貢

嶠家導漾之外別求一漾水以彌縫其失而卒不可得也乃東樵則以魏書地形志華陽郡嶠家縣有嶠家山漢水出焉執此文以誡班鄴夫禹貢漾水出自漢中之嶠家前此山海經則以為鮒禹山水經則以為東狼谷至後魏乃因漾水在是指所出之山而名之曰嶠家雖有經記可憑然在漢時嶠家自在隴西漾水自出氏道豈能逆料五百餘年以後之所追稱而強為附和哉道元于沔水東南流注漢曰沮口下云所謂沔漢者也尚書禹貢嶠家導漾東流為漢山海經所謂鮒禹山也補正之功不淺猶云成書未及追改使鄴亭負此長寬而復据陸王征途所記以為目驗得之夫二子即博學嗜古其所涉歷按據乘傳于川脈之遙修山嶼之綿阻不過望而測之世代悠遠荆榛蕪沒而率然斷以氏道水之不與沮沔相通殆非篤論也已况夫嶠家一山誠非小弱也禹貢梁州云岷嶠既藝導山云導嶠家至于荆山岷山之陽

至于衡山導水云岫冢導漾東流為漢岷山導江東
別為沱兩兩比較書法重輕岫之與岷未云多讓東
樵亦云觀漢志云岷山在徼外則固不可以湔氐一
縣限之知岷山脈之長而不可以湔氐一縣限之
曾是與岷相匹之岫而可以沔陽一縣限之乎程克
齊春秋分記曰梁州左山皆曰岷右山皆曰岫出于
岷者皆曰江出于岫者皆曰漢江有內水中水外水
之異漢有西漢水東漢水之殊蓋自秦州東望則為
雍之岫冢自寧羌州西望則為梁之岫冢禹貢表之
于梁而不繫之于雍則以導漾之功致力於梁而不
于雍耳真通儒之言也 朝廷欽頒書經傳說彙纂
云岫冢有二一在陝西漢中府寧羌州北九十里東
漢水所出一在鞏昌府秦州西南六十里西漢水所
出二水南北相去三四百里支派隱然聯屬所謂隴
東之山皆岫冢也何其明白易曉與故謂東漢水不
出自隴西之岫冢可謂隴西之岫冢必非禹貢之岫

冢不可謂禹貢之漾水出于寧羗州之岠冢可謂禹貢之岠冢必僅在寧羗州則不可也爾雅音義曰有水從漢中沔陽縣南流至梓潼漢壽入大穴中通岫山下西南潛出一名沔舊俗云即禹貢潛也然潛水實受西漢水鄭康成所謂漢別為潛大禹自導漢通即為西漢水也經云岷嶓既藝沱潛既道繫沱潛于岷嶓之下烏知禹貢之言漢不兼東西二源乎荆州貢道云浮于江沱潛漢足明四水之相通矣漢人說經各有師承康成大儒必不妄道三卿為衆吾舍鄭公將何從乎同時閻百詩最不信古文力攻以為偽書并謂孔安國傳出自東晉梅賾手然其說岠冢東西兩漢水源流尚不敢輕集矢于班志以隴西西隴之岠冢為非禹貢之所有氏道之養水為非大禹之所導如東樵所云者其尚書古文疏證曰東西兩山漢水異源同流按水經以漾水出隴西氏道縣岠冢山東至武都沮縣為漢水為漢水者為西漢水也故

下文云又東南至廣魏與白水合又東南至葭萌縣與羌水合鄰氏注云今西縣岫冢山西漢水所導也此是遙承班固地理志來不見有禹貢字是道元以班志西縣禹貢字為非而不顯駁之古人文多隱約水經以沔水出武都沮縣東狼谷中為東漢水又言沔水東南逕沮水戍而東南流注漢鄠氏注特標出尚書曰岫冢導漾東流為漢以大禹當日所導實在于此亡友顧景范謂水經不詳漢水所自出沔水沮水特入漢之小水耳反詳志其源忘却出今寧羌州者何與其說極是余請兩言以剖別之曰鄠道元謂東西兩川俱出岫冢猶言各出岫冢云爾而同為漢水猶言同名漢水云爾又曰按孔安國傳曰泉始出山為漾水東南流為沔水至漢中東南為漢水遠與前逾于沔傳漢上曰沔相照應補出此句最佳余欲以班志沮縣下注沮水出東狼谷南至沙羨南入江取武都縣下注一名沔過江夏謂之夏水十字補入

東狼谷之下南至沙羨之上漢水原委方備又曰常
璩稱漢有二源以東源為即禹貢之漢水極是與水
經各一書非承水經而為文者獨道元于水經以西
漢水為漾水曲徇其說寧取山海經闕氏荒誕之說
曰川流有潛通之理故漾漢互稱至叙次通谷水曰
上承漾水西南流為漢水漾水之稱仍屬東漢酈氏
微意居然可睹矣潛丘之言如此是故山連麓而水
異源山連麓故上邽之嶠冢與金牛之嶠冢皆為禹
貢之山水異源故西漢水為大禹所䟽通則已著于
康成之說豈後人所得而妄加之哉說者猶以班志
隴西縣禹貢嶠冢為疑大夫雖善辨卒不能減秦
州嶠冢之名則何如取隴東之山皆嶠冢一語深思
而細繹之也哉

丹水出京兆上洛縣西北冢嶺山

一名高猪嶺也丹水東南流與清池水合水源東北
出清池山西南流入于丹水

東南過其縣南

縣故屬京兆晉分為郡地道記曰郡在洛上故以為
名竹書紀年晉烈公三年楚人伐我南鄙至于上洛
楚水注之楚水源出上洛縣西南楚山昔四皓隱于
楚山即此山也其水兩源合舍于四皓廟東又東逕
高車嶺南翼帶衆流北轉入丹水嶺上有四皓廟丹

水自倉野又東歷兔和山即春秋所謂左師軍于兔和右師軍于倉野者也

又東南過商縣南又東南至于丹水縣入于洵

契始封商魯連子曰在太華之陽皇甫謐闕駟並以爲上洛商縣也殷商之名起于此矣丹水自商縣東南流注歷少習出武關應劭曰秦之南關也通南陽郡春秋左傳哀公四年楚左司馬使謂陰地之命大夫士蒍曰晉楚之盟好惡同之不然將通于少習以

聽命者也京相璠曰楚通上洛阨道也漢祖下浙鄴
攻武關文穎曰武關在浙縣西一百七十里宏農界
也丹水又東南流入臼口歷其戍下又東南浙水出
浙縣西北宏農盧氏縣大嵩山南流逕修陽縣故城
北縣即浙之北鄉也又東入浙縣流結成潭謂之龍
淵清深神異耆舊傳云漢祖入關逕觀是潭其下若
有府舍焉事既非恒難以詳矣其水又東逕其縣故
城北蓋春秋之白羽也左傳昭公十八年楚使王子勝

遷許于浙是也郭仲產云相承言此城漢高所築非也余按史記楚襄王元年秦出武關斬衆五萬取浙一十五城漢祖入關亦言下浙酈非無城之言修之

則可矣浙水又歷其縣東王莽更名縣為古亭也

一清

按漢志作君亭而南流入丹水縣注于丹水故丹水會洵有

浙口之稱丹水又東南逕一故城南名曰三戶城昔

漢祖入關王陵起兵丹水以歸漢祖此城疑陵所築也丹水又逕丹水縣故城西南縣有密陽鄉古商密

之地昔楚申息之師所戍也春秋之三戶矣杜預曰
縣北有三戶亭竹書紀年曰壬寅孫何侵楚入三戶
郭者是也水出丹魚先夏至十日夜伺之魚浮水側
赤光上照如火網而取之割其血以塗足可以步行
水上長居淵中丹水東南流至其縣南黃水出北芬
山黃谷南逕丹水縣南注于丹水黃水北有墨山山
石悉黑績彩奮發黝焉若墨故謂之墨山今河南新
安縣有石墨山斯其類也丹水南有丹崖山山悉赭

壁霞舉若紅雲秀天二岫更為殊觀矣丹水又南逕南鄉縣故城北漢建安中割南陽右壤為南鄉郡建晉封宣帝孫暢為順陽王因立為順陽郡而南鄉為縣舊治鄴城永嘉中丹水浸沒至永和中徙治南鄉故城南門外舊有郡社柏樹大三十圍蕭欣為郡伐之言有大蛇從樹腹中墜下大數圍長三丈羣小蛇數十隨入南山聲如風雨伐樹之前見夢于欣欣不以厝意及伐之更少日果死丹水又東逕南鄉縣

北興寧末太守王靡之改作今城城北半據在水中
左右夾澗深長及春夏水漲望若孤州矣城前有晉
順陽太守丁穆碑郡民范甯立之丹水逕流兩縣之
間歷於中之北所謂商於者也故張儀說楚絕齊許
以商於之地六百里謂以此矣呂氏春秋曰堯有丹
水之戰以服南蠻卽此水也又南合洧水謂之浙口

水經注釋卷二十